

光緒鎮海縣志

鎮海縣志卷十三

壇廟上

國之大事首在祀所以崇德報功答陰而理陽也
禮凡在祀典舉莫敢廢鎮邑壇壝之設各有定祀
他若勤事定國禦盜捍患固在春秋祈報之列而
鄉賢名宦忠義節孝從祀文廟外別有專祠禮所
謂百辟卿士有益於民者也至於里社之神水旱
癘疾禱賽有驗亦有功斯土者用并志之夫神之
憑依在德誠能絕矯舉戒豐昵先成民而後致力
於神庶幾明德薦馨也歟

壇

社稷壇縣西一里宋開禧元年令商逸卿置寶慶元在

縣西南郊延祐志明在縣城西北一里壇高三尺東西二丈

五尺南北如之四出陞各三級繚以周垣埋石北向社右

稷左題曰縣社之神縣稷之神壇下地南一十五丈東西

北各五丈嘉靖志

國朝因之歲以春秋仲月上戊日致祭雍正五年部頒定

式每案陳設黑色帛一白磁爵三羊一豕一鉶一籩四棗

栗鹽菜魚豆四韭菹醢醢菁菹鹿脯簠二黍稷簋二稻梁

曹府志

欽定祭文

維神奠安九土粒食萬邦分五色以表封圻育三農而蕃
稼穡恭承守土肅展明禋時屆仲敬修祀典庶九九

松柏鞏磐石於無疆翼
翼黍苗佐神倉於不匱

風雲雷雨山川壇宋附東海王廟

延祐志

在縣城西一里壇

制與社稷同壇下地南一十丈東西各五丈

嘉靖志

每歲

春秋仲月致祭安設神位風雲雷雨稱風雲雷雨之神居

中帛四山川稱某縣境內山川之神居左帛二城隍稱某

縣城隍之神居右帛一帛竝白色陳設行禮與社稷同改

望瘞爲望燎

大清會典

欽定祭文

雅

神贊襄天澤福祐蒼黎佐靈化以流行生成永賴乘氣
機而鼓盪溫肅攸宜磅礴高深長保安貞之吉憑依輦
固實資捍禦之功幸民俗之殷盈仰
神明之庇護恭修歲祀正值良辰敬潔豆籩祗陳牲幣

先農壇在縣城西門外距城五十步雍正五年知縣田長

文奉文建正殿三間配房二間大門一間

浙江通志

每歲仲春

亥日正官率屬耆民恭祭先農之神陳設禮儀照社稷例

大清會典

欽定祭文

維

神肇興稼穡粒我烝民頌思文之德克配彼天念率育之功陳常時夏茲當東作咸服先疇洪惟九五之尊歲舉三推之典恭膺守土敢忘勞民謹奉彝章聿修祀事惟願五風十雨嘉祥更沐於神庥庶幾九穗雙歧上瑞頻書於大有

里社壇卽今土穀神祠坊隅鄉都隨地建設皆如里之數

嘉靖志

今惟東管三都四箇有社稷壇在朱家村東南半里

周圍六十步高三尺許旁有古松相傳爲神所憑

乾隆志

邑厲壇在縣城外西北一里築土爲壇左右設寒林所與

上社稷壇風雲雷雨山川壇俱洪武四年知縣杜彬建置
嘉靖四十一年知縣何愈重修嘉靖志以清明中元十月朔
日祭先期三日主祭官詣城隍廟讀牒祭日迎神於壇設
位於上榜無祀鬼神牌於下用羊豕各三飯羹以次鋪設

乾隆志

鄉厲壇每里有壇如里社之數嘉靖志凡九所東管二都一

畝在虹橋西一里三都二畝在橫河堰包姓河北地二分
西管四都二畝在孔浦廟西基一分七釐五毫四都五畝
在東塢村五都四畝在謝家河兜基二分六都三畝在高
地頭屋後五都六畝在憩橋村夏姓田邊靈緒一都五畝
在八部廟東四都三畝在望井嶺邊乾隆志

城中祠廟

武帝廟在鎮遠門內

國朝雍正五年奉

旨致祭前殿奉關帝神像後殿奉敕封三代光昭公裕昌
公成忠公神位每年春秋用牛一羊一豕一簋十豆十帛
一後殿每案用羊一豕一簋八豆八帛一惟五月十三日
前殿用牛一羊一豕一帛一果品五盤後殿不用牛餘同

前殿曹府志咸豐四年升爲中祀新設樂舞如丁祭禮鄞志

欽定祭文

維

帝浩氣凌霄丹心貫日扶正統而彰信義威震九州完
大節而篤忠貞名高三國
神明如在徧祠宇於寰區靈應丕昭薦馨香於歷代屢
徵異績顯佑羣生恭值嘉辰遵行祀典延陳簋豆几奠

牲醪

祭先代文

維

公世澤貽庥靈源積慶德能昌後篤生神武之英善則歸親宜享尊榮之報列上公之封爵
錫命優隆合三世以肇禋典
章明備恭逢詠吉禋事薦馨

道光辛丑廟燬同治九年里人職員王仁澤妻吳氏倡捐千金囑紳董陳繼揆稟縣縣令于萬川募捐續成建屋兩廡大殿五間東西游廊各三間儀門五間其別廟一在城中心菴一在龍華菴一在助海廟西首一在城西半里一在武甯門外弔橋前一在南薰門外弔橋前一在南薰門外東街一在鎮遠門外三義祠一在東管白雲庵前一在靈緒二都一在龍頭山之陽一在筍竹岙一在崇邱覺海

山麓一在廣利菴西一在大石門一在泰邱陳華浦一在

海晏穿山所一在二都一畝水陸菴前一在鎮隅六畝一

在七畝小教場

乾隆志參陳志
葉及采訪冊

城隍廟在縣東南七十步梁貞明二年建

寶慶志

元至正二

年重建正殿山門

至正志

明洪武四年邑令杜彬廣其址重

修本縣儒學教諭邑人樂良為之記永樂十三年圯正統

間令戴鍾重建天順六年令賀懋加修邑人劉洪為之記

邱府志

國朝康熙七年令王元士重建加造廊房

乾隆志

謝兆昌記

郡邑之祀城隍於國門之外則壇之於國

中則廟之壇

以主廟則像壇則風雨及境內之山川並

祀焉祭典載在扶祀中其日以二仲之上戊守令率其

屬奉牲帛以告廟則城隍神有專祀吏民皆得致其將

享凡吏之新至與月朔望必瞻拜於廟屬祭則先期吏
讀牒於廟至期迎神於壇以臨之水旱則吏民步禱壇
廟皆往而郡邑有興作吏民聚議必於廟民間有事祈
祝亦於廟或張樂以侑神壇尊而廟親也吾定邑爲浙
省要地重兵宿焉故城池爲尤重其神祠則將吏軍民
同恃以爲保艾楚黃王侯來令茲土風雨以時禾黍屢
豐烽火久息蛟門虎蹲天險屹然惟我
國家之聲靈覃被奠茲東南神所憑依亦於是乎可觀
也故數年以來文武協和吏習民安輪將無或後時行
野依樛之人日以環集侯於是顧瞻橫捩與民謀之譚
吉庀材丹堊聿新不忘神功古之道也今年春侯以秩
滿遷二守於粵之瓊州而廟工適成邦人父老請余文
以記之且爲之銘其辭曰稽古建國有倂其城實壙實
壑衛我民生民藉其衛吏慎其守亘於遐年如岡如阜
衣食我民惟吏之績壽考我生惟神之錫定邑控海兩
浙咽喉封疆之臣未雨綢繆綢繆伊何民有風俗又何
綢繆軍有約束柳營干羽蓮漏晨昏以報神貺以報國
恩國恩孔厚神貺孔碩馨鼓勤工廟成奔奔川以成壁
山以展懸惟我神祀何以告凌莢丹菊黃旣登萬寶工
奏笙歌益羞黍稷藹藹王侯民功日庸桑條杏花紅女
良農修宮成梁役以書時侯學春秋親民於茲潔齊禮
神六閱歲月最政攸聞典郡東粵蛟江如練候濤山青

神警世
爰載斯銘

乾隆三十九年首事王仁一陳昌壽等同住持僧省三募

貲重脩

陳志

陳錫光記 嘗考禮凡有功德烈於民者則祀之傳曰先
成民而後致力於神夫休養生息興利革弊以成其民
者司牧之事也雨暘時若禦災捍患以庇其民者神社
之靈也幽明雖隔而神治通乎政治是以生著懋烈者
死必爲名神古柏喬松隆其棲止春祈秋報大其明禋
蓋成民與庇民陰陽無二理而官箴與祀典先後有同
理也我鎮邑自設城以來卽建城隍神社千百年來海
波不揚邊燧無驚歲比豐登兵民安堵是固
聖天子德洋恩普所致而亦賴神靈默佑於冥冥之中
實凡有血氣者之所仰戴於不朽也廟去縣治百武洪
武初年杜令拓地重建天順間賀侯撤舊更新後雖有
整葺者不過修補破敗而已越今數百餘年垣頽瓦破
棟折榱崩其正寢卑而且狹不足以壯觀瞻歲戊子夏
五住僧省三慨然有恢宏之志爰集紳士王仁一等請
於邑侯陳印簿弁序勸募城鄉士庶及閩省漁商共得
千有餘金住僧鳩工庀材焦勞罔倦正寢陞高丈許增

廣尺餘頭儀兩門及戲臺後殿重添檁楠盛施丹牓復因捐資不敷不辭竭蹶以勦厥成蓋自陳侯創始以迄今張侯越七年而告竣規制巍然增勝莊嚴煥乎一新賢宰執及紳衿士庶遠商衆擎固所莫掩而該住僧拈据之勞亦不容沒焉予自辛巳科謬膺會薦羈旅仕途不克與諸同事分任其勞然而有大典神社攸關未嘗不踴躍於耳聞目擊間也且神靈保障一方邦甯由於本固在神明之赫濯於既注者業已載諸邑乘而詳諸碑記無庸贅述惟祈自今以還水旱無聞而災祲不作俾邑之士庶兵民咸享承平之福則甯者常甯而靈者益靈矣爰薰沐而爲之記

嘉慶間里人陳廣義等重修道光二十八年車漢全等捐資重修未歲事而英人滋擾前工盡壞收復後興工越七

年告竣光緒六年邑人陳繼揆車穎等募捐重修

采訪冊

王曰升記 從來古人創建之事全在後人接踵而善繼之方克垂諸久遠故凡郡邑廟祠郊衢亭舍千百年來於今無恙者非皆有善繼之人與邑廟創自有唐迄今已千餘年矣自

國朝以來考諸碑記改造修葺已歷兩次然其中湮沒
無記可考者不知幾何矣猶憶嘉慶年間前紳陳君廣
義車君自明陳君世瑜傳君光祿黃君廷議見廟宇之
將頽也牆垣之將圯也慨然告諸邑侯陸公捐輸改造
非不巍然堅固但地臨濱海厥土斤滴頻歲多颶數十
年間下蒸上蝕朽樑斜殿已亥邑之人以余居齒長
來相謀曰廟之不修神無所憑凡我衆庶庇何仰焉余
雖老無能爲役感諸君子之誠且堅踴躍其間於是諸
君子踵循前例寒暑無間勞瘁不辭鳩工庀材日新月
異辛丑秋英夷犯順侵我城池一簣之功盡被蹂躪明
年收復重復興工至戊申凡七年始克告竣其殿宇之
軒昂丹雘之煥彩昭諸衆目固無論矣而神有憑依庇
吾民而獲歲有非深幸乎是役也八千餘金之資斧固
出於衆姓樂輸而董其役者則里人車漢全陳嘉穗傳
于謨陳定敏堅志圖成不啻心疲力盡可謂接踵善繼
其人與余不交料後之君子覽之必有興感今日之情
者幸其成
樂爲之記

縣土地祠在縣治內東

嘉靖志

海角廟在縣署內先是廟在尙書橋東順治初徙今所一

在縣南二十里小浹江上俱祀海神乾隆志

張越國公祠縣東北二里巾子上祀宋張世傑明嘉靖

二十四年訓導曹一和請於巡道張一厚建嘉靖志萬厯間

祠圯於風知縣朱一鶚遷主於表功廟明末廟圯

國初令鄭元成奉主祀張仙祠內康熙二十七年令周家

齊構造三楹仍額曰忠勳祠與明信國公湯和合祀春秋

致祭唐令志

全祖望記厓山三大忠臣祠倡議於羅一峯成於陳

白沙而任之者陶自強也吾鄉候濤山東巾子山為當

時張太傅自臨安入海駐營之地而未有祠并志乘亦

不載其事何其闕也况太傅之在是山非偶一駐營於

此漫不足為輕重者比范文虎以伯顏軍至皐亭山太
傳請移三宮入海而與文丞相合背城一戰陳丞相以
議和阻之太傅遂提兵東渡由慶元抵昌國營於是山
其意蓋已辨閩廣再造一局石國英遣都統卞彪說之

使降市彪故降將太傅以爲反正而來從已俱南也惟
 牛享之酒半彪慙從容爲致國英旨太傅大怒斷其舌磔
 之山中軍士慙憤泣下誓共求宗室以謀恢復於是太
 傅探得楊駟馬以二王至溫陳丞相出會之陸侍郎蘇
 統制俱赴之遂出蛟關沿海入觀共像定策事而二王
 之局以成文丞相指南錄雖於太傅不盡諸然於閩廣
 再造則以爲太傅一人之功蓋陳陸諸公雖素秉忠赤
 而非太傅以爲宿將重兵握其樞則其事不可集顧太傅
 之所以鼓三軍之氣而扶九鼎之絲者莫過於巾子山
 之一磔能使燭火重照死灰復然當是時趙孟頫以宗
 室子舉慶元獻冊籍旬餘城郭黠然無色豈知金鼃背
 上尙有人焉大聲疾呼白虹貫日是赤水丹山所以洗
 辱而二王一綫得延之自也而袁清容纂延祐志以其
 父爲元之降臣於太傅之遺蹤略焉至今未有及之者
 謬矣嗚呼國家不能常存而不亡忠臣志士成者一而
 敗者九願其所以常存而不敗者此配義與道之氣塞
 乎天地之間太傅之精魂如行地之水無所不至而况
 厓山宮闕與是山壑寨尤其神明之所惓惓者乎予乃
 與蛟關父老議立祠以祀之而勒文於石巾子山者與
 候濤山對雙關如門障蔽洪濤其下有洗馬池宋高宗
 航海時多葬侍衛軍卒於此者也其銘曰桓桓太傅來
 自臨安巧手磔降人投之蛟關兮展轉東甌逐日維艱

兮侯官一隅扶墜天兮踴躍東江而後灣兮崎嶇謝峽
而礪川兮沈香千兩焚厓山兮平章江口瓣香殘兮赤
坎之村埋血殷兮忠魂騎鯨任往還兮時來此間聞
長歎兮卞彪之骨化為老鰥兮春網登之薦豆籩兮
謝旂賢記鎮海巾子山舊有宋太傅越國張公祠建
於明嘉靖二十四年巡視海道副使張公一厚而請之
者本縣訓導曹公一和萬厯間邑令朱公一鶚遷主於
縣東北表功廟廟為邑人祀明湯信國公和廟祀
國朝邑令鄭公元成又奉主於張仙祠內康熙二十七
年楚郡周公家齊來宰吾邑年少任事負經濟才慨然
捐資建三楹合祀張湯二主顏曰忠勤祠春秋致祭復
作忠勤祠碑記碑向嵌祠壁邑乘班班可考而巾子山
椒之專祀太傅者遺址猶存甬上全太史祖望作太傅
祠堂記序太傅之功詳矣而曰未有祠志乘不載其事
則未覈也竊歎世人於一切叢祠紺宇不惜貲力極崇
奉之奢謂可邀福於冥漠中記曰非所當祭者而祭之
謂之淫祀淫祀無福至於忠義所關任其破宇頽垣風
雨剝落概置不問心甚悲焉夫是山為當日太傅自臨
安入海駐營之地思為再造計及石國英遺都統卞彪
說太傅降太傅怒斬之山中軍士感泣出蛟關沿海至
溫溫蓋故駙馬奉二王於此太傅遂入觀越數年天眷
閔位花樓鳳祝卒不應從此身殞虞淵然則太傅之忠

肝義膽充塞天地一息尙存未忍稍懈雖數百年青燐
碧血猶當隱躍於波濤澎湃間況是山爲太傅靈爽所
依坐令瓣香無焚溪毛失薦非誠闕典歟余與吾鄉諸
父老謀復祠於山屋不過三楹地不踰一畝率舊址也
買田若干爲春秋之費經始某年月日落成某月日輪
錢鳩工諸士側得附書并繕全太史記於右俾後之覽
者知太傅之功之不可沒共相綿延
於勿替也爰不辭而紀其緣起如此
謝篋賢擬謝處士張忠烈配食巾子山張太傅祠堂記
嗚呼自古忠臣義士遭逢喪亂計無所出磅礴蘊結
而不可解往往託於神仙詭誕之說以隱如漢梅子眞
宋姚平仲吾甚以其有用之材卒歸無用爲可惜也若
謝處士阜羽之於宋與張忠烈蒼水之於明忠義之氣
貫乎莫尚矣景炎之失馭也文丞相張太傅之功冠天
下當文山開府延平處士負奇氣長揖軍門諮議國事
章皇閩粵間及勢不可支始入浙下七里灘上子陵釣
臺擊石作楚歌西向大勸又嘗乘舟至鄞過蛟門登候
濤山放聲哭入夫子廟撫舊石刻魯碑賦詩見志夫處
士屢試不第一落魄布衣耳朝不坐燕不與非有尺寸
之柄足以邀結一時特感文山之知激發至此使其如
子眞平仲輩一往不返肥遯終世亦義士中之矯矯者
計不出此徒以國破家亡不惜沒齒以殉上視丞相太

傳其志節甯有毫髮異哉忠烈領崇禎壬午鄉薦錢忠
介集師甬上忠烈挺身先至迎監國魯王於溫授行人
歷官兵部尚書時甬相繼死事者四十餘人忠烈最
後功巨嘗四至閩六至台州滄洲及蕪湖瓜洲十餘處
數遭覆沒士卒屢聚屢散詳見北征錄中其晚居南田
之懸壘也思謀再舉勢窮力竭被擒入蛟關蓋自使閩
航海以來至此凡十有九年矣黃徵君宗羲以爲文山
往來海島不過數年馳驅不過閩廣而公虛喝中原而
下之且如是之久全太史祖望謂孔明渭南之師尙有
荆益可憑藉公則一無所資終於齎志以沒似孔明文
山所處尙易忠烈不更難歟我
國家如天之覆襄忠賜諡雖非忠烈之誠不足以致此

聖朝寬厚所以待亡國大夫者仁至義盡爲千古未有
之遇也是山專祀太傳其於處士忠烈無議及之者獨
念當日處士之登侯濤山與太傳之駐巾子彼此一羈
忠烈雖後數百年其一絲九鼎之志應亦太傳所心許
乎今卜吉奉二栗主祈祀於祠太傳之魂不孤矣系之
以銘曰浹江之東生三碧峯蜿蜒突兀正氣所鍾庸子
接武賢者開繼三忠把臂先後相從春夏之交海天蓬
勃士馬旌旗樓臺城闕人以爲蜃氣幻形吾
以爲忠魂出沒巾子一瓣香散作當年魄

湯信國公祠縣東半里祀明湯和正德閒御史成英以和

有功邊海請建廟賜額表功廟嘉靖志後祀與張越國公合

祀額曰忠勳祠唐令志

周家齊記 嗚呼古今塞滄溟彌天地亘萬世而不磨者豈不以忠孝哉人心賴以不死世道賴以長存亦惟此忠孝數人撐持宇宙而已禮崇祀報功之典非其忠臣卽其孝子外此則薦紳先生難言之歲丙寅余謁選京邸一夕夢過一廟額曰宋越國公祠余入而肅揖神顧余初無語視其左位有神如欲就余言者覺而異之既而授鎮海令亦初不解夢爲何意及之任遇秋仲上戊日例奉牲幣告饗則越國張公也蓋與明初勳臣信國湯和並祀焉張公宋室忠臣當時義兵勤王與文文山爲將相於國事既去之餘剛割元使之招降者於城東中子山慷慨擊節至崖海禱天運移宋祚願君臣同沒於巨浸中然後已此其精忠貫日豈有一日不畱於天壤間哉今其廟貌之圯而猶示余以夢中藉非公之靈爽式憑鎮海何由如此余欲爲之卜築久矣而今且以愛去用是與諸生耆老謀所以新之以成余志至於信國功尚封疆祝文並列其來已久蓋兩公風烈實相

伯仲余不敢
少更其舊焉

陳景沛案曰自

國朝鄭令創建張仙祠張湯二公神主奉祀張仙
祠前殿而周公祠主亦附焉

周公祠在忠勳祠內祀邑令周家齊鄞人陳錫嘏有記唐

志

陳夢蓮記 荆楚形勝甲天下三湘七澤之廣九疑岳
麓之大山水所鍾每多剛傑非常之士忠孝奇節之人
為國家黼黻皇猷為司土功德顯著蓋惟楚有材古今
彰彰不乏也我鎮邑地居濱海土田薄而河渠淺稍旱
即民穀之不登昔時海上未靖為司牧者方槽礮礮莖
糗糲芻茭之勿堪奚暇拊循而噢咻之康熙丙寅郢中
周侯來蒞吾邑甫下車謂備官邑宰即未能興教化亦
當詢疾苦肅豪強以芟除而先去俾毋擾吾民鎮邑斥
鹵田卒汙萊民且日愆公集紳士議濬淤數十年未舉
者公則獨斷以成即今渠成集誌公績也鎮之民半藉

魚鹽蜃蛤柴薪植木之利又以弛禁後餘艫雲集公則慮茲盜叢曷以永民利必寬其征求而嚴其稽覈庶貿易永賴又謂聽治之所教令文牘之所出也不開敵而密庀之無以宣吾政公則捐資竭蹶而堂宇一新又謂學校人材所自出公則葺聖宮崇魁閣精課試設義學勤講法而士民咸思興行力學而且城隍之修忠勳之建重祀典也漏澤之置婚資之給德及枯骨而澤能完配也催科有法民不擾而兵不呼也決獄若神知長吏之有法也此孰非公之百廢具修者乎此豈非其實心行實政乎此孰非公之章章就理者乎父老咸相慶曰楚之令吾邑者三或有其才而無其清或有其清而乏其才公以年少經濟優爲之敢不尸祝吾公紳士又相謂曰此蓋其家學也公之尊大人孝能揚親忠能拓地今日次第舉行者業有所本而治有所施異日之召入黃扉而皇猷黼黻者非卽此之功德顯著歟其志之邑乘而列諸名宦允無歉方將聿觀厥成以盡其所致治無何讀禮而還歸荆門矣邑之人德公思公而且肖像以祀公謂公之一舟圖籍兩袖清風可飄然往而人能忘公之德乎且肖像非具文也實有誠意之孚焉昔唐韓稜令下邳邳人德之爲像以祀後拜司空侍上上疑其醉對曰臣今日降旦或邳人酬臣臣且醉後訪之果然然則立祠之尸祝亦鎮人誠意相孚而冀其

潛爲默禱者也夫公之功不朽於浙而名仍重於楚觀夫列國不載楚風其附江漢於周召者曰樂只君子福履綏之惟公有焉勿剪勿伐召伯所茇惟民有焉後之司是土者可以公爲法也

張仙祠城隍廟左順治十年令鄭元成建

唐令志稟

鄭元成記 余之信祀張仙久矣嘗與里中同志廿餘人結社吾清汶許神有專祠焉誠心供奉其間窮達禍福有所必應應必速至於一二艱嗣者虔叩精禱應復如響迄今無子者寡子者數年而甯馨馨繞膝矣余少艱嗣朝夕虔禱神每夢降訓警速余年踰壯而長子生又五年而次子生因私期異日倘得釋臙服官毋論中邦遠域務建專祠以供香火以報厚德日夜念之惟恐不逮者歷有年所際

熙朝鼎興

龍飛順治之戊子余筮仕得宰蛟川初下車寇氛未靖戎馬未甯催科之外又事戰艦比年來公爾忘私君爾忘身曾不得與百姓休息何暇問事神哉然哲於登山伐木越陌問歲之間未嘗不留心聖像冀得一瞻禮仙顏者乃海邦僻陋絕無專祠余因慨然曰此真余報德之日矣辛卯冬十月余復舉一子溯厥所自豈非神錫惟兢兢以不克建祠是懼會此中士民聞吾言而感激

焉共成勝舉擇地而祀之祠與城隍廟鄰城隍所以保
障一縣一縣祀之而一縣何得不祀之語曰祥所以事神也
下天所以保民也余承乏茲土無善可述於百姓有心可
仁所以鬼神因以保民之意寄諸事神之舉今且仙像儼
質於鬼神因以保民之意寄諸事神之舉今且仙像儼
臨祠宇新煥歲月間信心祈嗣者率有顯驗豈非張仙
之靈矣哉然天下皆已知祀張仙而余復諄諄以張仙
告於天下誠使此邦之人謂余保民也可謂事仙也亦
可且聞有大功德於民者則祀之余豈敢私於張仙直
以大張仙之德廣張仙之靈而重以願海邦之子振振
繩繩令此祠與城隍同其不朽是余

之報施於萬一云爾故謬爲之記

謝泰宗記

稱隨有其祠邑令鄭君昭舉子之慶也蓋君蒞定四年
熊羆之夢再應休嘉麟祥益集所謂居官者長子孫仁
政之報哉惟君不自有而推其報於冥冥若曰不幸遇
考最之駿以吾催課於此調劑用緩或不至大斂大巔
卽未能盡棄孟青編請示辱然鷹擊毛鷲弗爲也而民
猶有沈命課累之苦諸市價所售會計出入雖與矩券
相應亦安能損上益下使肥者常在民也况臺使者部
使者案部下邑又無能效何易於躬挽艦艘以代農時
之勞歲遭併隔雨陽未時若也卽平羅賑饑所活幾何

諸橋梁壞壩蓄洩時備誠不忍高高下下罷民於畚鍤
茲者軍興執轡者甲不解壘兵不解翳孔邈在上徒
負如傷之痛負愆之弗遑其何有後嗣計卽君子有穀
爲子孫貽其如蒼昊之不宵何吾實自訟諸內差與由
房者語也然興門之男再舉丈夫子未嘗鐫弓禡祠高
媒也而履帝武敏歆之說又儒者所不道豈卜子夏相
固自有之乎聞之諺有打彈張仙者善錫福於爾類每
值懸弧未嘗不通靈寤寐安得俾有所憑藉以爲歸也
乃卜諸城隍廟左構材三楹肖像以祀前而廣除而開
屏稱之若曰使民有鄧伯道歎者共洗心於此也至矣
哉公之用心乎爲政有成而不自有其成卽撫字省薄
諸大政亦得民而治矣得民斯以得天室家和處子孫
蕃育有自來也安得仁人長者言付之冥漠不可知之
數且託之仙而建祠以奉其曰俾百姓洗心於是共
衍錫胤則又若實以爲祥有所發慶有所開不敢秘諸
己而公諸人使民由是而庶幾免於後難之虞是心也
諸大政所從出也由己及人推恩無已飢溺之逼眞莫
切於是焉余聞世傳張仙之儀蜀主孟昶像也蜀亡花
蕊夫人攜其像私室奉焉宋祖卒忽而夕之也夫人詭
對此張仙挾彈彈天上孤星人以此卜弄璋矣於是世
間遂謂實有張仙之神而布其像以祈嗣君豈弗知之
耶君蓋鄭重其事以借休於明神推遜其詞以爲非我

所敢輒有之也然百姓有心其亦有口瘡痍起者鴻雁
集者家尸戶祝以爲琴彈而愠解靜好之音治諸宮壺
是其景命有僕矣石燕旣入懷乎五色雲化爲鳳已集
左肩平吾儕小人具享家室單父之堂豈琴瑟弗御也
宏慈所覆保赤子於懷中明德之後多達人毋乃膝下
者繩繩而未已也吾知張仙之神必有所附附諸百姓
之心與口而不能自己者矣不亦得民以得天之明驗
哉吾方自以卯翼無成勞而歎然於其上故以充閭之
慶謠諸默佑此又愛民無盡之虛懷質諸鬼神而無疑
詒孫謀而可久者矣抑聞古眉山有張遠霄見四目翁
持竹弓一鐵彈三質錢三百千張無靳色翁曰吾彈能
辟癘疫宜寶而用之遂授以度世法然則又似實有張
仙其人矣其能辟癘疫以回天豈不能爲人祝嗣以延
後公固有說於此而非以誣民者矣是祠之建以辟民
之癘可以祝民
之嗣亦可也

二聖廟在張仙祠左

乾隆志

張公祠在一鑑池上祀邑令張琦今圯

唐令志彙

沈端憲公祠在城隍廟東街康熙五年重建卽南山書院

基地乾隆志

忠勇祠祀官兵之死難者明嘉靖十五年倭寇登岸兵與格鬪力竭而救援絕俱被害邑人憫其忠勇立祠於靖海前柳營

國朝祠圯遷於東門內關帝廟東廊邑人張懋建顏其額曰忠勇其墓在城內關帝廟東祀田一十九畝六分初屬招寶山僧人管業今歸總持寺歲收供祀乾隆志後寺僧盜

賣田畝令喬序驤斷續復舊乾隆四十一年令周樽令寺

僧於寺內疏地建祠春秋遣官致祭田畝勒之碑石陳志

周樽記昔魯有僮汪錡夫子許其勿殤齊有敝無存景公爲之親禘蓋執干戈而衛社稷矢必死之志作忠以報國捐軀以立功祭法所以有以死勤事之祀也明之倭寇爲害尤甚長驅直入騷亂浙東方其伏自岑江

從於白泉雖以胡公宗憲爲之力剿而兵甲之富舟楫
之多計謀之奇時日之久旋散旋聚蓋平定若斯之難
也嘉靖十五年倭寇登定海岸官兵諸人與格鬪而救
援絕官兵被害然城中聞警知備卒保無恙特其姓名
不傳邑人立祠於靖海前柳營置祀田十九畝零歸招
寶山僧供祀後祠宇傾圯遷東門內關帝廟東廊田歸
總持寺僧收息後有僧覺明盜賣田畝前任喬公半價
斷續乃復其舊嗟乎此諸人者倘得詳其姓氏當其時
必有顯揚之者卽不然而傳至今予亦能考之志乘案
之祀典上其事而表其忠願乃側處帝廟東廊旣非所
以安毅魄而春秋享祀更無糾察宜其祀之漸就廢弛
又奚怪司田之人生覬覦也耶余因邑人邱應麟首告
飭令總持寺僧蓮秀卽於寺內蔬地建造忠勇祠門堂
戶牖燦然畢備春秋二祭遣官奉行所置田畝細號勒
之碑石已於是而竣夫顯忠旌功
聖天子之所有是也宣
上德意以表揚忠烈亦有司之責也因爲之歌以祀之
其辭曰追維忠勇靈爽如存志乘有載姓氏無傳操戈
被甲死而爲神爭先處強繁惟諸人伏莽鴟張救援頓
失刃墮於胸孤忠不屈甯殲吾軀民弗可戮臨危之傾
百身莫贖有廟弈弈爲君改築享祀匪懈春蘭秋菊伐
石作碑壽之貞珉歌辭徵實用慰忠魂乾隆四十一年

八月 菜字五百八十三號崇民田四則土名老廟前
共計十畝零內有水漕一方菜字三百二十八號崇民
田二則土名柘墩頭又紗帽坵共量計二畝四分又水
路二畝六釐菜字一千二百三十九號崇民田一則土
名鸞山村量計一畝五分零李字九十
號崇民田一則土名楊家田量計六畝

都督俞公祠縣東半里鎮遠門內明嘉靖三十五年爲都
督俞大猷建嘉靖志祠基地二分舊祠屋三楹

國朝雍正二年圯里人陳殿颺捐脩有祀田四畝一分零
向係指揮劉李陳三姓後裔值祀今歸邑生陳錫卣管理
爲歲時修葺諸費乾隆志鄞豐道生有碑記見金石備志

朱公祠在總持寺內祀明知縣朱一鶚乾隆志

黎公祠祀明知縣黎民表在梓蔭山麓後與總兵楊宗業
並祀純陽閣中閣圯今在總持寺中備志

薛三省記 黎侯令吾定政既成且徵矣而奉太孺人喪以去士若民相與歆歆咨嗟志所爲不忘者卽梓山之麓肖侯貌祝之而以碑屬余記余惟慕德以文猶尸祝者以貌也余顧瞻祠所貌豈必盡儀侯之毛髮而惟大致是肖望者皆低徊久之嘗若侯儼然其上也故巧爲儀者貌其大工爲摩者略其細凡侯所爲吾邑至悉顧其足不朽者自有在愧余之拙於摩也蓋侯所爲百世之功者一所以爲兼利之澤者二所爲易數十年之害而爲利者三苦心而周後來之慮者四定故鎮也國初易而邑而城故鎮也卑且單嘉靖末倭薄城幾陷時方急軍興不暇議增築隆慶初潮乘颶又幾沒於是稍增其北偏直海者而三面猶故城也屬離使者方公行部俯城而危之具訊得往狀亟下檄議而苦空帑不給郡守吳公爲括府藏贏金若干度不足則請出關稅若干佐之臺使者不盡報可曰姑先最敝者而須後令涉兩歲工不能十四侯至多方經理且躬爲勞來踰年而役竣但新故形若補苴且多牙不相錯勢益脆侯熟計苟若是且併棄前功顧無所得費復以關稅請益不報而第檄侯自爲計久之乃得折役與他羨若干以興役又踰年而竣則百雉屹然海上甚壯定扼海而邑蓋全浙咽喉也城固則定固定城固則全浙固而東南半壁俱固是侯所爲百世之功者也邑歲有租調二賦皆里

所監而租率以嗣歲輸邑之爲里者九十今歲主調明
歲復主租而租又有折有本主折者又明年復主本凡
此九十一人率三歲僕僕受役勞且費侯與里約自今歲
始一人兼主二賦盡一歲而更邑人便之請著爲令而
來年主租者無所事役錢供城費前所爲折役者卽此
也而又精勤簡括銖黍無罅漏合先後城役所贏幾三
百金以構雉爲使守陬者有所蔽風雨而百姓則不費
毫末焉蓋侯慮悉於一城伸之縮之公裕而私家之財
力亦賴以不困是所爲兼利之澤者也邑賦有定額而
徵科無定籍里與胥吏得互爲姦異時侵負常鉅千官
與民兩病侯廉得狀歎曰弊所以至此者蓋賦名多而
經賦者人衆故籍淆而姦易姦也今役併於一是漏厄
可漸窒已乃總邑賦而里分之又各計里多寡數而五
分之以爲期卽著爲籍及期則官督里又設一役佐里
以督其遞遞所輸不及數里不爲登於籍里所監不及
額官不爲登於籍且當重鎮役最繁而上下易爲守卽後
來不能以意更矣邑當重鎮役最繁而上下易爲守卽後
若蓋慈邑所輸租而吾邑人爲守庚當其輸時邑不
得問也其出納時旁有漁獵者又法所不能窮也而風
雨鳥鼠之所耗則罰且償焉故民迷是役如迷死卽稍
有貼直無補十五也侯閔然嘗思爲更計會郡太守欲
以貼直爲僱直募司啟閉者而出納則官制之下侯議

侯力從與成之而增議優募直使人樂趨若使侯議盡
行百姓可終無肩背顧而今眉睫之間亦暫舒矣邑多
卒伍寄舍遍閭里則火攻諸具亦宿焉易召火熾烈不
可嚮邇里人走主請徙置城外又慮一旦緩急左右顧
卽侯亦莫能得也已行視城陰得故治局遺址旁儲水
可制火乃捐少俸以賑餘起兩局一以治繕一以制炮
破類自是邑以內非召災亡憂具燼矣此所爲易數年
之害而爲利者也邑西並海有汚田民久棄而他徙業
然籍在官賦無所取給其里之長遞爲蔬幸一稔以完
逋賦非所得已也久乃始成爲田黠者因私構訟爲間
田以白府分給郡邑庠各半咸以高下賦租侯爲奏記
已充邑賦又輸學租是重困民也半奪邑田以爲外賜
是鄙邑士也當時卽議不盡行今猶得援侯愷以情赴
畿旦夕得復故焉邑乘不輟者且五十餘年侯慨然曰
何可當吾世而文獻無徵廣爲採拾且有緒而奪於憂
則封留學宮曰以此爲他日綿叢夫人情苟其躬之不
問違恤其後侯於所不得爲則規其終於所不及爲則
規其始以視傳舍其官者何如哉此所謂苦心後來之
慮者也凡侯所成民造士者不第此自他令緣飾之皆
足以收名譽然於侯直其小者余故略而不具爲墓其
大者如此若其具者梓山之石可盡磨牙

陳景沛案曰辭公爲黎侯楊公兩碑記一在梓山麓一在純陽閣中迨後閣圯而並祀於總持寺中乾隆志爲先祀寺後後祀閣中則失考矣

楊公祠在梓蔭山麓純陽閣中祀明總兵楊宗業閣圯今

在總持寺後

陳志

辭三省記凡將必有與同意而議可持也有與同議而計可決也有與同功而名可取也蓋天下未有與同事而功可就也有與同功而將爲甚將用衆者也迨於今而所爲用賢於寡輔者而將爲甚將用衆者也迨於今而所爲用之者日益衆故今之將其不可莫之與也又爲甚莫之與則傷之者至矣楊公之鎮吾浙也非久而遷已遷而復報罷此何以故也公起騎將不數年而登大帥其材請足自致未嘗抑其意以下人性復強直不屑隨時態窺人意以與俱上下其素所挾持也議論往復如注而切事情臨事籌策究及本末雖所未嘗若見成事不失毫末焉計成而行行僚懽敢任不爲首尾顧畏初之鎮銳然欲顯功名於海上務自慨滌以觀將校海上幸無事

念不忘寇至恆躑躅風濤中以爲士卒先蓋居無何而
旌旗之色易黠而傷又無何而卒伍之籍易耗而充又
無何而器械舟楫之用易鈍而利卽異時大帥數年於
鎮號稱能舉職者未易數數也顧帥所能舉僅此耳越
此勢不得復問也雖所得問而遠不在宇下者勢亦不
得復問也此非格於法而不得問也帥懦者有所不能
而榮者又墨而有所不敢帥失權則衆操勢非一日積
也所由來漸矣夫勢成而欲帥反之也猶反之也猶操
反溺權散而欲收之勢已成者難以驟反而權已失者
柄則反傷其手矣故勢已成者難以驟反而權已失者
難以急收反之而人不能我順更思所撓之矣收之而
人不能我子更思所奪之矣夫事至而成敗異計計效
而利害異議議出而是非異趣此非有劃然之局者也
各惟其意所造至於意伏而陰陽異向蓋不可爲方物
矣故力能奪者顯持其計以奪其議而功名之不能奪
操其意以撓其計此事之所以難任而功名之不能奪
立也從古而然矣然公意殊驚然不顧也嘗私慨曰凡
吾所不惜捐利以潔其身者爲名也所不惜捐生以勞
於國者爲功也而今日奚爲故顧吾受性已定猶形之
修挺矯健必不可易爲偃偃也名可辱功可隳吾素必
不可易吾終行吾意而已何以官爲也蓋竟公去無以
異於始至云公始至將卒稟稟嚴公法久之法行而衆

爵里具在文
昌祠碑記中

陳志

100

宣朗上

十七

計軍驕且悍未易以法繩惟身先將率約已奉公收士
心士稍輯徐申號令明賞罰以肅軍法然不爲刻意第
以一示警耳偶出行有絕前導過者訊之則隊卒也公
問若甯醉耶敢干吾前行未及對使嗅之果以醉白公
命繫之俟其醒乃薄懲其人忽呼曰吾先有大功此小
過可贖也公問若何功則曰往伍譁時挺身輯衆者我
也公曰是必諱首能搖衆故衆聽以從此大罪也當斬
惜前已赦今不得竟吾法但以干行論鞭而貫耳以徇
於衆於是衆皆股栗轉相戒毋犯乃公法惟公所令矣
公故越世家知名諸生中饒有方略因以武奮益思以
功名大其世且私幸開府故里誼非悉心爲國卽非所
以爲家凡桑土計慮無不極其縹緲而語異雖寒士必折
節下之望公丰儀玉潤更山立禮恭而語容生平工行草善
詩歌時所不廢而當其快意或決拾以控弦拾臂而擊
劍以武自雄及海防則禦樓船乘長風破巨浪爲士卒
先故士卒咸爭爲用海上自隆萬以來希倭警而姦人
私闕出與倭市點者駭其非法因掠以爲利久之併商
船肆掠且質其人以責厚贖水軍遇之少則格鬪屢挫
餉度不能格則遁去及收保則復尾而往來爲盜時或
獲之則盡投其器與所得盜資於海若爲漁而橫被虜
者以逃法水軍當之亡何也以此盜日橫公計市商船

數十艘伏兵其中少示貨誘使掠而突起擒之或足一大創而諸將校多異議卽主計者亦以國計方誦市舟多則費無所出少則不足制勝亦異指公乃儲募府餘資市數舟而選死士伏以出如往計時盜降者能知盜主名躍舟詐與語伏猝起盜不知所爲凡獲舟三擒及溺死者亡慮數十百人盜自是稍震恐時天啟五年冬月也明年春防且圖多設伏爲誘而公先以大計中蜚語解事矣蓋方伍譚之初定也武林譚復起樞部聞而無所致詰則移譚鎮府庸知海上之譚不當公武林又遠非所部勢不相及也顧莫爲明者公亦俟公論不自明而媒孽者始得乘之矣先是海上獲異舟獲者欲殲以爲功公察其人髡而文身蹲坐皆倭也而獨聲耳與倭異使譯倭者譯之語復不相通謂非眞倭而以實聞當塗於是倖功者若謂非公所親部故尼之微爲他語中公公不能知也異時商遇盜者投狀幕府置不聞以杜口及公盡收議欲以知所當盜何在其畫而守者何氏且及贖贖日又知盜何嚮謂可以鞭策諸將校使收後效而懼譴者又若謂公有意督過之更謬爲他事中公公亦不能知也蓋公坦衷未嘗過爲調伺且自以在官無他失職益不復自疑乃樞部先已疑公所爲治軍狀及是併疑公所爲治敵狀遂爲所中矣夫將之罪莫大於妄殺以徼功其弊莫甚於匿情以揜罪此兩者皆

義所不敢出也而謗又緣以入且其爲謗於外初非有
臆列之狀也卽於內亦非有盈篋之書與三至之言也
直一夫之類所陰中耳乃輕易置大將若戲置碁難言
哉難言哉公之去士伍奔走乞借不可得則爲祠尸祝
之以志思且礪石待記功德者而余適罷歸里參軍王
駿圖乃以衆志乞余言余拙不能立具踰年而參軍張
應龍又以請蓋久而繫人之思如此祠構於卒伍而士
與民咸驩然樂爲觀成其祠地三之一則僧慧寶所捐
此益知公功德所被不第在戎行間已也因併
及之公名斌臣中辛丑武會試家紹興之山陰

陳景沛案曰何公祠地無考慧寶杜言僧是時居

觀音寺記中云捐祠地三之一則亦在梓蔭山下

文昌祠在梓蔭山明萬厯十五年教諭顧充建後燬三十
六年總兵楊宗業重建三十九年郡判李文華捐置祀田

邵輔忠記 今國家功令置學宮春秋祀孔子匪懈蓋
學士大夫靡不統於聖其祀文昌者何說者曰文昌主
仕籍司祿士乞其靈而冀奮庸始比比祠祀焉夫文昌
懸象著明豈其俎豆祝史之是愉快而以祿秩錫爾士

乎余考化書傳文昌變現如龍漢鸞臺諸異未足深信
至所稱子孝臣忠實有當吾夫子所求臣子之義則議
祀也何不可乃吾邑祠祀於梓蔭山者何蓋邑居郡之
東偏而梓蔭山更居學宮東北艮上按分野皆在斗實
應斗分奎杓之間第六星司祿座尤宜祀吾邑自祠祀
以來邑大夫長茲土者相繼興起人文較往昔隆盛若
神爲憑之誠天造梓蔭山以供衆盛則虞不給使諸文
可也使其學博士分其首藉以顯文昌之盼蟹矣雖然祀
學采其芹藻以羞神明則虞無田辛亥秋會別駕李公
來按海關上徘徊於山禮文昌之宮遂慨然捐俸鑄置
田若干文昌祠祀之有田自公始諸士進而前曰今者
獲邀大夫之靈俾文昌無乏祀更得邀文昌之靈顯我
多士當煩大夫不朽公曰唯唯否否因進諸生而訓之
謂祠有田願多士無荒之荒祀田文昌將不永厥祀吾
何庸置田爲抑學猶植也更願多士無荒之荒乃植多
士亦無以食文昌賜多士又何以祀文昌爲惟是多士
服孔子之教處爲孝子出爲忠臣一如文昌乃善祀文
昌者哉於是踐畝量數以授學宮掌故附於祀典時則
得武原吳廣文領其事而出膳資設几刻石以廣古虞
迴瀾顧公祠祀之意云公楚藍田人諱文華署教諭事
舉人吳之英訓導盧仲海田數載於後一東管三都
民田二坵係荒字一千四百七十九號量計六畝四分

有田溝隨本
田南溝注水

國初祠內置火攻局順治十三年邑人謝賡昌請之鎮守

移局旗蘇廟祠重修

唐令志棄

謝泰宗記 余往見文昌祠於他邑者多附宮牆內定
獨祠之於山自明嘉靖間始即山尾宮牆而鎮其後蓋
山脈過江峽而重興自巾山傳梓蔭梓蔭傳學宮爲一
氣之通祠於山猶之宮牆內也舊祠爲堂三間殿矣萬
歷年大帥楊宗業者新以樓而虛其中俾未始登樓者
亦得瞻仰展拜也明末值捍將之擾蕩爲軍舍
興朝以來制火攻礮藥於其內神欲凌煙霧去矣且局
鑄諸欄門屏人窺伺狀卽山亦可望不可近也家成起
臣家弟天童遂請之大帥常公移藥局旗蘇廟凡三稱
得計可而祠門始洞然啟蓋幽而廢者十有五年聽於
神乎聽於人乎於是鳩工庀材修廢舉墜若垣牆之塗
甍構榑案悅之重締一如其初構而堅壯倍之甯特神
祇之享披雲霧靚青天哉樓下爲堂又慮軍容作舍則
奉人土像於中三僧守之吾未知帝君之樂有大士之
教擇大士之能爲帝君說法也要其爲僧施食總不能
爾爲置田若干畝以贍俾長興祠爲不朽是僧之有所

記以奉禮秩之役也故事歲春祀孔廟第二日學博士
率弟子員用牲醴帝君前以藥局故不舉久矣至是瞻
廟貌肅威儀苾芬俎豆第作其冠者思皇美濟也先是
祠門外地皆岷嶺錯磔高下其履保昌龔侯覆以石縱
七弓橫十一弓周以琢欄平與階齊廣可坐百人於風
清月夕之下夫然後羅漢堂純陽閣觀音寺諸勝槩不
勝擷也止水之審爲淵泓澄其側者不勝掬也祠觀日
美祠靈日發矣今石之功固在弟若姪而猶是龔侯之教
復歸於樸乎潤澤之功固在弟若姪而猶是龔侯之教
不衰耳博士弟子羣相謂曰居恆苦遊息乏所以閣之
高朗樓疏四綺左奇相右禹強山川之氣萃焉卽二三
子談藝於斯邀神明祝其亦曰不有甯宇今荆棘刺眼
亦安得隙處若茲土者登高能賦龔博好句於朱衣爲
異日點頭地亦帝座之所勿棄乎無奈布策之失其據
橫膝之無其具何於是製連几可以代梧連坐可以代
跪者共若干器而以友會文者殆月無虛日皆曰謝氏
之貽哉正以教天下之爲靈昭昭也何必七曲矣祠於上者
得氣於是山山之爲靈昭昭也何必七曲矣祠於上者
信非文昌弗宜但或建或修必得請大將軍豈帝君嘗
定王均之亂誅吳曦之逆宿以武功自喜者歟卽火器
爲局猶曰文武之備具是也寶錄曰身十七世爲士大
夫不知其何所據但其言殊足爲儒者勸不惟鬼神之大

德之盛也卽博士弟子員修業而息之於斯用牲祭於
聖人之後豈能神錫之福能降休辭眼雲迷目五色時
耶夫子職莫隆於孝臣誼莫大於忠吾儒之訓實三教
統焉神固報母讐而梓潼是從是能不負竭力之憐仕
晉戰歿王事何篤於代終誼也不然者夫豈無他所而
必附於宮牆文之爲文忠孝盛焉耳弟姪輩於諸君子
遊息於是甯徒修詞是飭將以效帝君忠孝之業於不
窮亦世修其德以爲爾極錫僅廟貌光寵哉請質之大
士焉知非卽化身說法者

謝泰宗詩 斗北文昌司祿權尙書喉舌帝君前地非
七曲堪層折身傍三台欲補天筆醺南山騰虎勢池臨
東海卽鯢淵昭回雲漢蒼蒼出謝眺驚人句可傳斗
光氤靄萬家遙呼吸際穹宇氣自朝風雨三江羣起壘斗
杓八座貫重霄中天龍柱長城倚瀛海蛟門
巨壑超清興登樓元不涉太平煙火樂魚樵

嘉慶六年奉

諭旨郡縣各建專祠祀典與關帝廟埒春秋致祭

陳志

祠

內屏山堂建於宋嘉定中帥臣馬柄郡人應燭記之其制

堂舊三楹今合爲一閣其上奉文昌神閣後有亭曰迎秀
南有軒兩楹閣之前爲牆牆有門門以外舊有日臺方丈
許卽其址擴之登石興築亦建閣於其上曰養正廣與文
昌閣等經始於道光十二年十月其工材則郭侯澹章寶
鳩庇之落成之歲爲十五年六月也光緒六年里人朱景
遜王忠恕兩房重修

采訪冊

倉帝祠前在梓蔭山魁星閣右側同治壬戌克復縣城後
移至迎秀亭舊爲文武殿遺址

采訪冊

姚燮頌 四太混初黑頭顱愚含三所朕可哉可無九
頭五龍合額連通飲噴代令不設幫觚穆帝顙凌駕
預皓顙挺如蚪並明麗目靈寶金鉤受其天籙演以啓
傳正形自然融沼模象科斗蜺蜺而得敷十六奎躔
搽輿索緯明鑿聰鐫形領誼包挽殺而憂太極因显儀
象充萬津之爲書相札爲券指掌勞臚君營民憲憲章

昭大營理揆倫綜之葉屑外範无垠誓用者慎帝不受
冤訐揚者譏帝豈任恩九男拓固拒神守圖三一攝道
玉堂閣符綽閣辰放知生几蓬祿蠡兆域騰嘖皮茹元
奄運徂未剗厥瓠帝迺踈之而萌其華考中皇結繩經
連山文昭儀貴堦壝鏡徵苞儀九翮惟帝傲之以揭爾
噴味邱索既亡六籍斯舉堯舜文武有表有序于以承
之周篚孔既六合灌膏壘三緇五實觀帝之光克續厥
緒西周而降詒謠日紛離龍炙輶肆計汨倫破折誼律
曲竄深文擅亂自聖籲籲猶信實惟帝之罪人芥然陽
品鑄膏固蝕載聚載防江河胡舉萬妙駢羅帝均
其極於皇錄哉式而則哉胥賄胥逡疇能測哉

梁氏八先生郭張二先生祠梓山閣後今廢

陳志

陳夢運記 一代更姓改物之主必有抗節死事之臣
非析骸摧骨則閭門焚燄亦曰臣節固然以婉覲顏而
事仇者然未有以臣試若以叔篡姪以忠貞為奸黨如
文皇之赤十族而烹鼎膏妻孥給卒之慘酷者也幸高
帝有靈讓皇得出於地道顧使無從亡之二十二入亦
不能脫萬死於一生乃其給資糧覓停居遙相應援者
則吾邑之梁良玉梁田玉以暨梁良用梁中節四先生
之功居多焉先生之行事載在吾學編續藏書奇秘錄

存褒什諸書得載梁氏八人其四逸其名而劉玉樹膝
錄又有郭良張安國二人確有所據歷今三百年而里
人不傳其姓名邑乘莫載其里居始而奪於國威繼而
拘於忌諱故老遺黎曾未有道忠節而表遺烈如黃練
方鑑之爭光日月也者迺黃練方鑑諸賢後則錫謚贈
廕予祭立廟而忠烈亘古今以赫奕顧十先生之湮沒
如故幸也諸書傳記載其遺事耳不然十先生之忠魂
等於補鍋河西備之埋名遁迹後之學者亦孰從而知
邑先達之與緱山並峻者乎豈天下之死節有不幸
十先生之死不及諸賢潤鼎齒劍之烈烈哉第先生之
心固非徒以一死報國也推其志捍主於艱冀有興復
之計濟則君之靈不濟則繼以死浸假而先生不死如
文臣之爲胡爲金爲解武臣之爲李爲盛爲平始相仇
繼相附終不免於罪或亦僅保爵位而已烏能如先生
之一姓八人或死於問關或死於山死於海依依故主
不計滅族不問身後以明委質不二之節較之赤族支
解不相上下猶夫或奴或死歸贊歎獨是吾鄉有梁氏八
抗節死事之書未嘗不擊節贊歎獨是吾鄉有梁氏八
人補忠錄又載郭與張二人而邑志不列後裔無存烝
嘗莫逮良足悲矣雖然十先生之忠義貫日月塞天地
不可泯滅也而況潛德幽光固有歷久而終不可磨滅者

歟嗟嗟先生之軀可縻可滅而史書紀載歷千百年而愈出今吾邑南七十里而梁家廟土人相傳爲梁氏故里徒令人歎歎憑弔於荒煙蔓草間迴憶析骸摧骨闔門焚經恍然如覩節概凡建文死事諸臣郡邑皆立祠而鎮爲缺典蓮嘗偕同庠某某以專祠請於黃令令詳郡守曰可先是某捐資闢梓山閣後三楹以奉武安王今欲卽其右而俎豆焉其面則臨大江怒濤澎湃海山屏障巉巖峭厲十先生之峻節與流峙同永亦足以妥其靈爽矣

張懋延記靖難時吾邑盡節者多有其人而梁氏爲尤盛其見勝朝典彙從亡錄載梁氏三人吾學編載梁氏四人續藏書稱梁氏父子兄弟八人同仕於朝素以忠義相勗建文旣遜國相率變姓名遜去要皆本之王詔忠賢奇祕錄詔松陽人錄中有梁四先生贊其贊田玉曰行儒名釋知我其誰至寶淪後人行可垂贊良王日忠臣塞塞遵彼海濱就書旣市莫以盡簪屯如遭如哀此陸沈贊良用曰相彼柏舟載浮載沈中流誓楫懷我好音或完我族或明我心贊中節曰駕言導引騶傲林臯顏波莫挽使我心勞存褒什有弔梁田玉詩忠賢奇祕錄誰傳田玉完名在簡編同逐亂離髡髮去不應零落葉希賢弔梁良王詩

紫薇花蔓玉堂虛海外生涯博士書不信同時花下客
五陵煙草尚踟躕中梁良用詩風波不與世浮沈擊楫
濤翻誓此心應有靈均遺恨在共垂青淚入江深弔梁
中節詩黃冠痛飲古鄉違國難從教自昔悲二子故鄉
歸未得種桃何處亦相攜按勝朝典彙梁田玉定海人
官至郎中靖難兵入金陵田玉與葉御史俱髡髮為僧
避去梁中節未詳仕何官少好讀老子太元經靖難後
與郭良棄官同走出京城為道士入山去梁良用亦定
海人父子兄弟八人同仕於朝靖難後相率變姓名避
去良用去為舟師已而死於水或云梁氏父子兄弟為
舟師投水死者五人梁良玉中書舍人梁中節族也靖
難後訣妻子易姓名挾微貲走出金陵城逾嶺至南海
寓市肆鬻書為業以死忠節錄郭良亦正海人也
人所云二子故鄉歸未得者同弔郭良故也

魁星閣在文廟東首不知昉自何時後為颶風所圯康熙

年間令周家齊拓其址更新之

采訪

謝兆昌記 予考漢書地理志奎婁為晉分野蓋奎主
文章故聖賢之生其鄉為甚盛康熙乙丑我
皇上鑾輿東巡親祀先聖於闕里國有禎符星在降婁
光華垂燦楚中周侯以丙寅秋中令吾定海自其視象

之初輒以人文爲先務今年春上丁釋菜禮成厯階而
望以爲泮宮東南宜義然峻起爲此地賢才利其鋒穎
且風氣所迴旋也前人豈無議及此者乎博士諸子矜
皆言舊有魁星閣十年以來興風所傾石礎尙存久待
更新侯曰更新之則吾長吏事也因問棟楹瓦甍丹堊
之屬其費幾何閣廣高幾等丈也其面勢視故址乎抑
與形家議之也梓材宜遠致乎抑臨閭商販或有浮艤
至者乎陶與石取諸郊坰山麓乎諷干支之吉與善經
始者抑何人之可任也子矜具言材所爲良楷挺植所
爲精猶人則某某能辨此侯曰甚善若金錢則用吾月
俸外或未贖大夫君子飲成之方練日以庀事鳩衆而
商船載木泊江許工師繩尺之圍徑皆中度木長且堅
美邑人父老謂海濱謹斥畝以來越東治室久不覩杉
自南來矣今君加意興學作事謀始商旅不招而至吉
孰甚焉斲度既就三月甲午拜祝升梁晨雞初鳴曉鐘
未動晴空月弦星牛將中纖雲未縈有零露士庶來
觀歌舞忭舞自季春以懋新秋閣成而落之侯手書榜
其上曰奎星閣字畫古勁得唐人遺法像則肖斗魁仍
其舊也蓋侯讀宋史而記當時五緯集全宿數百年間
巨儒名賢比肩接踵今年丁卯歲次適與之合侯之用
意蓋如此然則治行如侯豈祇於簿書期會徵其勤敏
以稱能者乎侯名家齊字二南由貢生湖廣安陸人張

博士玲孝廉錢塘人沈博士節貢士嘉興人口許銓
精於營度董厥成焉例得附書閣之初構也諸子衿與
予約事竣則屬文記之系以詩者志喜也其間日曉色
扶桑海疆可接泮水鏡中景映城堞泮有芙蓉其葉
清子衿抱書其來徐徐學爲名家器爲國華如玉在璞
含輝無瑕賢侯蒞止楚材秀起探侯胸中富於經史其
經伊何惟風及雅其史伊何惟班及馬嘗稽宋初五星
連珠克生多賢兆見於奎侯有署書新閣之上季海誠
懸雅意臨仿方縹女牆方栽叢桂學道愛人惠我子弟
子弟親師侯則造之子弟敬業侯則勞之侯語子弟文
章日新以照青藜以獻紫宸閣成臨
眺山環水外四望晴川作我襟帶
謝泰宗詩斗魁七政玉衡齊兩兩參成筐載西天下
圖書東壁府彥林司祿北辰躋三能色正明良會七澤
占看湖海低何事裝成茶墨像乞將有造斗杓提飛翬
閣建流虹渚幹井雲垂車蓋棲側耳歌絃三百里因風
蹀躞九千蹄龍賓慧業元香守鳳閣鴻文太
乙黎身傍紫薇窮碧落朱衣爲兩指前途
張玲詩銀海學麗門之東奎宿高峙透碧峯風雨歲
久蒼莽中目攝手搢難爲功凌霄近漢來周公指顧而
辨應鳳龍譬輪有輔張有弓其樂只且光
融融雲霞千里傳清風楚天浙水笙璫同

沈節倣唐人無疆頌體云海邦既奠安日維興文治
文質時彬彬學行相繼起兆茲發宮東越崇尊星位
訾之舍精光燦哉實上帝文章之府景福方來余協
周君既卜且勒毋敢或怠以祈麻邑士之聲聞人咸曰
不承承於億斯年以德以思

洋山廟縣東北五里山在昌國縣之東北海中唐大中間

黃洽記其廟案黃治宋人問當作建以為隋煬帝建炎四年車駕幸

海道加封其二妃曰惠曰順夫人曰明德此別廟也是年

燬於兵紹興五年重建資慶志縣東北半里餘儒學西嘉靖志

謝泰宗記邑治之東北學宮之西有廟祀神曰洋山

廟神冕旒委裘衡統紘紼南面而朝諸侯狀廟故向西

為門三楹殿如之制度狹小僅足奉香燈無土地常秩

以供瞻祀廟祝屬於其下者三數百戶遷佐尸糗飯失

其口者數矣奚暇為漏淫計梁木壞而不問松栢墜而

誰舉如匪行邁謀築室之無成勞也實逼邇余室往時

補筵支斜之費無弗余家自出茲崩弛墮者過半廟

貌露處而失其素余家昆季豈敢以往為解奈其勞莫

敢任者有比隣傳應聘者里中太邱也慨然以締構爲
己在卸故材易新材凡十有一月而告成塗墍之茨丹
獲之煥卽神靈亦若革貌而改觀者傳子有功於是廟
或有功於境內之民也夫民歲朝朔望率男婦膜拜宇
下以祈穀遮熱畜遮育老幼之無天闕瘡札男女之無
厲疫災禍莫不並走其望卽神之誕降鐘鼓噲吟恭獻
不腆祝純嘏之多福亦曰神聽惟休和平矢音也豈其
數椽弗舉令暴風淫雨數與神明爲難毋乃我四境小
民實負闕德借口奉執事之不閒閒亦何定居之有乎
夫神固不能自舉其祠也卽降殃降祥陰受其轉移神
亦將徐有所待冀我輩惡始善終以晚蓋也若登年以
載其毒怒甚而振譴庸及乎是傳子不憚蚤暮拮据以
成之也及考廟所從來邑乘但記宋建炎中建而其神
則爲隋煬帝相傳漁船泛舟海中有地名洋山峯森突
靈盪波撼拍天舉頭見空中有袞冕垂旒者自言隋煬
帝脫爾等於厄漁商歸而祀之矣然乎否與記自故老
卽文獻不足徵而其極乎無窮者似乎有據之談且神
既著迹洋山俾漁舶無失所是亦有功於祈望者也今
大禁方嚴海王之國鹽筴廢而數罟不入汙池鰥寡罔
蓋徒望洋抱歎神其默翦此寇焉俾民復樂利之業而
享有甯糊血食不獨此一方民矣

謝泰宗詩 煬帝江都自返眞忽來海上駕明神迷樓
酒滿長春館錦纜晴牽蓬島濱護國風清千里浪庇民
香篆一椽新拜瞻筵几增

虔慕不覺穰題沈宿塵
附寶慶昌國縣志洋山廟原文洋山廟東北海中唐大
中四年建黃洽記云海賈有見羽衛森列空中者自稱
隋煬帝神遊此山俾立祠宇建炎四年車駕幸海道以
煬帝不可加封特封其二妃爲惠妃順妃夫人爲明德
夫人敕藏於廟近方刻石又載知衢州袁甫記紹熙元
年令王阮修縣志謂神遊之說不經然寇之欲掠也必
卜焉弗吉卽散並海之民賴之故久而不廢或又云煬
帝迹不至此陳稜伐流求國廟於賔山岱山或因其臣
祀其君如長沙祀定
王并祀高文二帝也

國朝咸豐八年六月里人集衆捐貲以謝泰履祀地助入

廟基增設臺門址更擴焉

采訪冊

眞武宮縣東北半里鼓樓鎮右鐘樓峙左歲以三月三日
爲神誕雨暘弗若文武吏士禱於廟

國初殿桷崩時大師在海神見夢於裨將某罔知爲帝君
及拜像得之因以檣桷首舉里人咸撤新之殿後闢閣上

塑玉清元始天尊像

天恩集

謝泰宗玉清閣記 邑治東北更設真武帝宮鼓樓震
於右鐘樓時於左儼具龍虎吟嘯之象歲以三月三日
爲神誕地方父老羣醺祭賽歌舞宴飲以娛神意雨暘
弗若則文武吏士禱於宇下以祈脫併隔之患以其奉
上帝命往鎮北方統攝元武之位得以尊收令自行矣
然合窠見則責是任而輓蟻勿與焉惟繁露所載早禱
之術則諸陽縱諸陰實於神有厚望焉屬殿桷之報崩
也大師在海神見夢於某偏裨偏裨罔知爲帝君及索
像得之以其檣自舉也殿故二層殿後餘甌脫地圍六
七丈許鄉之人聚而謀曰以殿之羣車鳥飛也後無繼
焉猶爲孤處卽茲二三廟祝奉香楮於斯貨贖神廬求
精氣之合須顧於形家言以久延其苾祀亦我諸里老
之福也卽帝神其亦有退業遊息之所不特地之荒蕪
是惜不卽誅茅羅窟蠅蟻藉豐草爲長林依嶧豺爲
朋黨不亦職明神而貽我里老羞乎相與治錢鑄俾茶
麥蔞止也則鳩工庀材以爲閣庶幾望殿脊而高卑不

致懸甚又謀所以位其上者邇釋大士乎源流之不問
以爲非我族類焉又豈無儒門先哲足羽儀當世振起
斯民之頑儒者無奈草木之臭味有別即天門諸神是
將挾風霆騁虬駕琦璫驪而呼召嚮字符者夫惡足與
天帝齒夫擬人於其倫神亦猶是也無已則塑玉清元
始天尊像於閣上乎或道首仙班教不甚遠乎甚矣夫
里父老善附其說也本以崇大茲宮用宏茲資而巍房
高閣之是顯以爲前若後毋或相失而風雨之藉庇震
爽之互收猶若甄陶於一氣是殿與閣異用而同功殊
形而共制者乎今誰謂神武勇猛而五千言之不可與
知誰謂功成自日飛昇而青羊肆之不可相訪則夫八
十一歲而始出胎與夫修煉四十三年而始成道者共
一攻苦也哉蓋玉清元始天尊即上清太上道君太清
太上老君世稱三清擬釋迦三身而分言之其實一老
子也老君生而自首足踏三五手握十文爲九丹八石
度世法以至絕穀變化役使鬼神之神術無不畢具何靈
異也帝君以至淨樂國太子生而神哲察微知遠其遇邪
魔必欲除之務盡是剛志修煉者也老君易姓名無世
不出或號元中法師或號金闕帝君或廣成子支邑先
生黃石公河上公歷增其行矣帝越東海遇紫虛元君
授以道祕又入武當山修煉獲神人授寶劍奉天帝命
往鎮北方躡坎離真精建皂纛旗統攝元武之位功行

豈易滿者哉共一度世法或道德經或驅邪劍齋之度
世耳總是三宮正一法而洗發心性與役使鬼神不越
三宮正一耳若似有是殿不可無是
閣以配者甚矣里老之善附其說也
謝泰宗真武宮雨壇詩無奈高穹竟若何似嫌黎庶
此方多海東未有含冤女境內誰驅炎魃魔請到再三
神已瀆哭聲暉緩反成歌元冥
黑帝天生水安得焦乾比愛河

庚桑祠在濠橋上祀明署縣安世鳳郡人屠隆有碑記今

圯唐令志案

旗纛廟在衛治內東嘉靖志

馬王廟招寶山下雍正年間移演武廳東北乾隆志祭馬祖

先牧神廟定以春秋仲月甲戌庚日禮志旁供參將李大倫

銅保像陳志案同治壬戌兵燹後燬采訪冊

謝泰宗記王者定三革隱五刃則馬之為用利哉既
習其用不得不勤其養而推原所自出以借休於冥助

則吉日之詩所云既伯旣禱者是也在天文房爲天駟
辰則大火又暨爲龍精月值大火故原蠶有禁謂其與
馬同氣天駟星爲之祖其以戊之日爲吉日戊剛日也
外事用剛哉實以馬生於午稟火氣而生故以剛日爲
吉日也若巍然立廟設像而尸祝之則後人治習之陋
也今觀其像則馬面而人身或星體固若是乎不經觀
者見以爲怪矣北邊不塞校德嗣武孫武子生而驍騎
是習者故民時獲馬之用既勤其養又推所自出以崇
奉其先俾保育而無瘥疾不特師中然也在昔七監二
十六苑多在甘肅九邊諸處其地水草良於馬而潔誠
獻享以奉馬祖卽隆之虛號曰馬王其仰賴者大故尊
敬者崇若依之爲物賈綱惡者故老相治以爲神像如
是卽家諭戶曉不求深解惟知時至禱求相率爲苾芬
之供而海濱處者惡足以語之大將軍前川張公畜官
私騎計三千匹居一歲而耗乏者將半公一怪之以屬
馬醫對曰不宜於牧地也公恍然謂斯天所以責我者
深哉謂我享其利而忘其本貓鼠尙有迎祀疆場之役
于望裏尸者誰爲政也於是擇演武廳西偏之極處庀
材爲廟以主神祀一門爲間一殿爲三間值東營房上
頭而彈壓於是土也庶幾神之有靈校人其弗倦於六
馬之屬矣其祭則以五月五日爲神誕行享禮廼以火
日也我海濱之民又惡足以知之哉稽古周禮春祭馬

祖執駒夏祭先牧頒馬攻特秋祭馬社臧僕冬祭馬步
獻馬講馭夫是四時皆有祭也牧政寓焉且其祭各有
位號不但渾稱曰馬王也馬祖之外有牧則始乘馬者
矣牧之外有社臧僕謂善馭若王良造父者又有馬步
者謂如諸消耗神欲加害於十二閑之政教不得不禱
祀以免之也乃今第歲一舉繁簡禮既不同又無位號
之各別但渾稱其神曰馬王豈馬頭爲王之王原非有
所加隆於其稱者哉且執駒則嫺習其步猶教駢之政
而攻特爲其蹄齧而使之就範於轡馬介倪於月題
今建是廟而祝之者亦將以訓庾人圉師掌教是職者
不忘斯義乎夫牧馬之政在周十六井出馬一匹天子
提封百萬井有戎馬四萬匹盡養於民盛世則然茂漢
則牧於民而用於官唐人牧於官而給於民至宋初牧
之在官繼畜之於民又市之於戎狄明朝兼用之散之
內地者卽宋戶馬之令牧之邊地者卽唐監牧之制設
茶馬於川陝猶宋氏之戎狄也惟
興朝盡以馬給將士而官養之西北諸民竟忘保馬之
苦且生則報數死不責償但馬蹄覆驗而已國政何寬
恤哉而公惟疆場之役是兢兢也則利於其用而無敢
遺所自爾若夫猪槽不可飼馬石灰不可泥槽旣汗不
得繫門牧夫知之矣然我海濱民顧益驚之也第知有
龍王廟何知有馬王廟馬固以龍爲友與公之馭是馬

猶駕是龍何海波之弗靖也哉

它山廟在縣北半里祀唐節令王元暉宋乾道時敕賜廟

曰遺德寶慶三年封善政侯

曹府志

國朝嘉慶六年

敕封孚惠王舊係西向二十一年拓地面南

陳志彙

廣德王廟舊額東海助順孚聖廣德威濟王廟在縣東北五里宋元豐元年諫議大夫安燾起居舍人陳睦奉使高麗還十一月請建廟敕封淵聖廣德王崇甯二年賜額崇聖宮大觀四年加封助順二字仍建風雨二神殿於左右宣和五年又加顯靈二字封風神曰甯順侯雨神曰甯濟侯且撥賜官田五頃皆因高麗使回奏請也廟碑知制誥

鄧潤甫謨知明州王誨書建炎四年車駕幸海道二月十日有旨改封助順佑聖淵德顯靈王廟燬於兵紹興二年重建乾道五年九月二十四日敕賜今封東海於祀典甚尊淳化二年因祕書監李至言祀東海廣德王於萊州南渡以來萊州道絕乾道詣書加東海二字於封爵之上正祀典也每歲春秋及郊祀告報必降祝文書嗣皇帝某謹遣臣某官某昭告於某神非常祀比矣初賜宮額本以奉神歲度道士俾主香火宣和五年道士乃請淵德觀額紹興間重建遂祀神於廊廡以觀爲主而神附之甚失朝廷崇奉之意會道士告觀廡將圯郡爲聞於朝寶慶三年守胡榘以颶風猛雨交作又舉唐孔戣薦馨南海故事申請

專置廟宇得祠牒一十有五郡增給緡錢且勸率士夫民
旅助之統制司輟瀕海房廊十五間之址拓築海塗面東
迎洋立殿三閒翼以夾室風雨神立殿前之東西拜謁有
庭獻官有位門閉高宏拱護嚴翼時紹定元年也

寶慶志

案廟燬於兵火光緒己卯年重建仍以淵德觀爲

額見寺觀

龍王殿在淵德觀之西見寶慶志縣治圖今廢

陳志

火神廟在縣北二里乾隆四十四年令周樽建

陳志

周樽記 神之爲靈昭昭也而火之於人則尤有神而
若揭者觀夫以此養生卽以此蹈死以此利用卽以此
成災倘所謂神者不宜如是耶
聖天子懷柔百神求民之莫凡所爲扶危而恤患者皆
先事而爲之防及事而爲之救而格於皇天百神擁護
蒞茲土者其可不仰體

聖心成民而致力於神乎夫神所以佑民者也聰明正
直而壹者也依人而行宜其錫茲祉福惠我無疆矣顧
何以見於春秋有若司鐸之火桓僖之災也然猶曰人
事爲之耳乃至烏鳴於毫社星孛於辰西又非盡人事
之爲而天變之不可測者矣雖然天變不可知而人力
則大可恃昔廉叔度不禁火而民安作人皆悅歌曰叔
度來何暮劉昆爲江陵令禱於神而神以雨沛然下雨以滅
息之夫人之可以格神而神之可以回天也久矣鎮邑
地瀕江海偶有火作卽苦融風燎原之勢不可嚮邇夫
婦辛苦奔竄惻然傷之每思叔度之才而效劉昆之應
固非徒以儲水備豫除道行燧畢乃事也且夫顧瑱氏
有子曰黎爲祝融故祝融爲火正實列受氏姓封爲上
公視爲貴神國有大祥於是崇之今鎮邑向無神廟則
將於何祀之而於何禁之耶予因爲之量基址集成棟宇
正北方之位而安南離之宮旣捐俸爲創始而集衆紳
士以落成之不渝月而竣復得國學顧生國庶捐田二
畝爲神誕設供之需契交戶總書收執流傳辨祭而祀
事庶弗廢墜則夫物有其官官修其方火不爲災民不
罷病其庶可以答
聖天子崇祀恤民之意乎爰爲之歌以祀之其辭曰稽
古河圖案篇咸括火之生成地二天七載考洛書次二
曰火性惟炎上序乃司夏光分於日陽附於陰榮惑列

象徵管垂音守茲職者祝融之神烈而生畏尊而不親
羣飛鳥革輪輿斯崇享祀不忒典禮攸隆壽諸貞珉守
而勿失以康兆民以燦萬物願生一則巖竈田一畝七
分土名五畝邊計二契一則巖竈田三分無契土名六
畝邊俱著戶總書收租
辦祭乾隆己亥歲九月

魯公輪子祠在火神廟後光緒三年新建

采訪

朱懋濱記 客有手鐸來告曰吾曹執業不忘所自始
亦木本水源意也古有公輪子名班者見於經傳孔孟
亟稱之他邑皆隆廟祀惟鎮海無聞焉春秋俎豆歲無
定所殊為缺典前人有其志而未逮後人艱於貲而未
遑子盡為先聲之舉乎余隨其崇報之心誠且篤允其
請而玉成之乃相度閒曠地於縣城北隅卜吉書券公
贖立案爰庀材鳩工而董其役而說者曰上古穴居野
處自有巢氏上棟下宇以待風雨為宮室祖今梓匠獨
崇祀班師吾竊惑焉余曰唯唯否否經典非權輿於宣
聖而自漢以來歷代帝王奉為師表豈不以道集大成
其功倍於前聖也哉班師以規矩繩墨之法傳於後世
官府造作者舍其法不能成方圓精其技可以勒工名
形上與形下大小雖殊而報成本之道一也從而祀之復
美疑歲在戊寅九月殿宇落成輪焉與焉黝堊一新為

正屋五楹爲門屋符其數中建舞榭周圍繚以垣墻門
臨池水約醲金三千餘緡大半出於手民廟貌雖未崇
峻而堅緻牢實期於久長吾知神所憑依將在是而永
永歆格焉屬余記其巔末以示來者余嘉其有志竟成
而樂爲一言鐫於麗牲之石時則
同事助資者例得備書於碑陰

廣濟林王廟在縣北二里又別廟在鎮隅七畝神姓林名

友直瑞安人乾隆志自宋元來歷封忠武孚佑昭惠廣濟王

載東甌記廟爲明初所建至今屢著靈異節略

周傳記余既治鎮之三年凡所爲壇壝祠廟之設次第興復蓋以祭法繩之有其舉之莫或廢也歲終紳士鄭汝義等有爲余請曰城北有廣濟王神能禦大災捍大患護國佑民屢昭顯應今廟圯非所以答幽冥也余取捐資勸募庀工修造踰月告竣門庭階廡悉擴其舊紳士因請余記其事余嘗考之邑乘舊碑並東甌記載錄其畧曰神姓林行四名三益字友直浙之瑞安人生於宋熙寧戊申五月初四日嘗憩永豐橋亭面發赤汗流浹背人問其故乃曰吾方在海捍船勞甚數日後榕城舢舨商賈踵以謝人益信其神繼有遭賊劫者率衆力

拒中矢不顧賊懼潛退少頃語人曰吾翌日逝爲神矣
及期沐浴更衣端坐而逝有司聞於上立廟東郭咸濟
初詔封廣濟侯元至元丁丑鄰寇剽掠勢張甚俄而神
威顯赫有大旂見於雲端賊黨奔逃邑賴以甯迨至正
戊申朔流民假道入閩疫氣傳染死者枕藉郡侯禱於
廟民保無恙未幾州倅李愷漕運出海波濤泊舟衆號
神護佑風濤頓息事聞於朝封昭惠廣濟公癸卯冬猛
虎入城衆草敢攫知州趙榮祖禱於神虎伏殿前受斃
上聞之加封忠武孚惠廣濟王東甌之有越人趙姓者好
初鎮始立廟城北隅顏曰林四郎廟有越人趙姓者好
義而貧乏遇神贈百金使之貿易屬以獲十還本到鎮
城北問林四郎可也後果獲利持金至鎮不見有林四
郎其人者及到廟見扁額神相駭然於郎乃神之靈因
設祭修殿以去崇禎間海潮湧入城民有沈竈之患
邑令郡督督總鎮赴廟祈禱湧潮即止
國朝康熙三十六年城守劉公成功捐俸修理并建聽
潮菴於廟後前令唐鴻舉作記勒石更顏曰廣濟王廟
舊碑之所載者如此乾隆十二年秋風潮大作塘潰人
城舉邑若狂夜見北城上有神燈往來須臾風轉潮平
前令王公壽彌上其事於憲巡撫方公觀承扁曰明光
上下春秋崇祀志之所增者又如此夫神之顯應也二
見於宋四見於元二見於明而一見於我

朝撫今稽昔神之所以捍災禦患者豈有盡哉余雖陋不敢辭因爲之記其事而作歌以祀之其辭曰神昔翩然來帝旁誕生水國東甌鄉仗義扶危莫參商擊賊惟多身益強乘風變化人蒼茫詔許立廟祀馨香魂魄剛毅御陰陽馮夷效順蛟龍藏驅殺猛虎如烹羊神靈連蜷下海疆佑民護國建非常手捍洪濤惠澤長殘碑姓名流芬芳北隅耿耿有光神靈照耀天際翔銀山高掩波不揚千秋志乘煥文章丹楹畫棟羞我觴春秋蘭菊普萬方承宣

帝德咸蒸嘗乾隆四十五年仲秋 祀戶北民田二畝

一分六釐六毫零民地
一畝六分六釐九毫零

義火祠在城北月德菴前乾隆辛卯年邑民錢世彩捐貲

建嘉慶二十四年首事謝文運費茂泮捐貲拓地重修增

建堂室

陳志

同治壬戌兵燹後邑人捐貲重修

采訪冊

李恭渭記

吾邑之有義火祠前知鎮海縣事滇南周

侯所創建也周侯兩宰鎮海時在乾隆中年越至於今

已八十載邑人須侯之德不衰謂其葺武廟移忠勇祠以及修龍王宮林府瀾浦兩廟與夫造同善塔新火神

廟整義愛祠創千丈塘並增置書院膏火等有此諸善政也而不知義火之有祠亦侯爲之倡鎮地瀕海貧乏者多賃屋以居泊乎遷徙他所宗祖神祐相隨以出有不幸至於絕滅者屋既屬之他人勢又不能安置往往將之寄頓廟寺凌雜淆亂莫問誰何此不特抱殺而之痛抑且有無歸之歎矣侯知之慨然曰是豈可以無居停之所耶侯以視人之禮視鬼以視存之禮視亡爰捐廉相地於月德菴之旁建屋三楹凡無主之香火均得人焉名之曰義火祠存與滅繼絕意也里之父老謂飲水知源宜周侯之像位於其中嘉慶道光間祠宇傾圯屢經修葺並贖其地之售於人者咸豐歲有好義者又於祠之外各建屋三楹中祀土地神基址較舊擴充落成之日僉云不可無記屬余謨文議其緣起如此侯諱樽字壽南號眉亭雲南昆明縣人由舉人仕至安徽布政司使布政使

三元廟在向辰門內

乾隆志

同治壬戌兵燬八年里人柴振

玉等捐資重建旁設城隍行宮

采訪冊

完者都元帥祠在縣西北坊隅

嘉靖志

今廢簡要

邱府志案曰完者都蒙古人襲世爵佩金虎符鎮
慶元路涉獵經史剛斷有謀在職凡二十年營戍
鎮靜島寇聞風懾服每祝曰小萬戶飛將軍願無
再過也臨政一以公道力行不疑有司畏憚不敢
毫髮厲民以禮化俗天曆中拜浙東道宣慰司都
元帥前職如故至正五年以疾卒兵民相弔繪像
以祭焉

晏公廟縣南半里祀海神乾輦志又別廟在清川門外與雙

吉菴鄰采訪冊元晏成仔江西清江縣人元初輸文錦於上

都因而尸解人以爲神立祠祀之後顯應江湖間明洪武

初封平浪侯浙江通志

梓宮廟縣西北二百步施家衝今稱宋帝行宮乾隆志廟中

有古柏二宋南渡時物也里人謝閭祚有詠柏七絕鄭朝

宗謝書祚張懋延和詩三章俱詳古蹟

國朝同治壬戌兵燬克復後里人捐貲重建大殿光緒四

年里人方爾標林沛堯朱懋廣又建門樓五間采訪冊

張懋延較川詩話有屠辰州甬東江北歌詩云夫差

破後已亡吳會說清江駐舳艫惟有輅臨猶自昔干門

洛日自啼鳥按輅林邑西管鄉村名成化志載路林所

謂村以姓名如孔浦白沙半路張輅與輅臨相近之類是

也今志改作鷺林亦泥於近有鸕鷀村耳越滅吳甬東

之封已為文種所沮自後惟宋高祖破孫恩於浹口然

此時尚屬將軍也宋高宗為金人所逼實幸吾邑宋史

所載帝乘樓船次定海縣是突然則輅林當稱輅臨豈

別耶

王公祠在縣土地祠內祀邑令王夢弼陳志

陳景沛案曰王公有功於邑奉祀宜也魏令右曾
自嘉慶三年蒞任歷俸九載訟無大小視可斂賄
者多寡盡取毫無德政足以傳誦去任之年行私
惠於紳吏以微名譽遂援修塘一端置產植碑并
設像與王公並座涇渭莫分後之秉筆者勿混入
循吏傳中

靜波廟在縣西三十步

至正志

一名薛將軍廟世傳唐將薛

仁貴征遼道經於此撫安人民後鄉人立行祠焉

成化志裔

孫淮東安撫使居實重修宋高宗航海賜額靜波

嘉靖志

義愛祠在縣治西靜波廟左祀明邑令時偕行龔葬

國朝乾隆十六年邑令王夢弼查丈祠址歸靜波廟祀藝

鎮海縣志

卷十三

疏以助香火東西各十五弓南北各十二弓計地七分五

隆乾隆四十四年邑令周梅重建邑人感其德設像並祀

焉陳志

士民公立碑記
定邑侯民祠之崇
鎮稱古定萬歷十四年時公偕行爲
字也亦祠而奉之
且各有紀績示垂不朽治及
國初時公祠地邑人徙遺像合祠於龔額曰義愛由來
已久今則棟宇飄折無一存者因就靜波廟中爲兩邑
侯計託所焉而祠址舊基歸廟祝茲疏我周侯蒞止間
考志乘旁收輿論謂是古名宦也盛德不可忘民祀不
可沒捐以清俸命鳩工庀材仍建舊址離治西三十步
俾後之有位者切近縣側咸知風勵用意固甚深厚某
等忝居隸下因念民俗所關首在土行而土行所習斷
推學校時公之創舉射圃龔公之修整殿廡皆爲學校
謀久遠我侯既勤丹雘而復嚴課社以鼓諸生不猶此
意耶且夫士安於學而民艱於農水利不興則田苗不
實督令濬河築渠修塘使道饒無聞野輸恐後而餉有
餘糧以視設法賑濟全活黎庶之時公爲何若也以視
鎮兵告餉愆期脫巾趨郡而策單騎之龔邑侯又何若

也爰抒義愛特附生祠鼎足而三焉或有謂葺武廟建忠勇祠以及林府淵浦龍王宮等處俱費經營嗚呼是皆有功德於民者也夫獨不與重建義愛祠同一熱腸乎斯何異千丈瘡大有橋種種要區厯厯經意注爲阻礙蓄淡無失浴河所推暨及澤流枯骨倡同善塔而復卜地西北隅置大神殿以護生居此則更爲守牧者所未經見也不揣庸陋爲文以記並樹碑以傳後之去思云公姓周諱壽南號眉亭滇南人由舉人出身鄉試同考官兩次宰鎮三任今陞同知乾隆四十五年孟秋月

助海顯靈侯廟縣西半里侯姓孔象山縣童翁浦人諱嗣鄒行第七志操剛烈爲鄉里所憚咸不敢斥其名侯死有富都監巡吏劉贊夢侯告曰上帝錄吾生平之善命爲此境神姓名已籍於水府而吾屍泛濫沙浦君能收而殯之且創數楹俾有棲托必爲民利贊訪其屍果如所夢乃卽所居地葬而祠之錢氏有吳越靜海鎮將以排筏航海驚

漕危甚夢侯許以冥祐順風而濟既歸乃立廟於鎮兵部

侍郎皮光業記之宋建炎中車駕幸海道賜號顯靈實慶志

國朝道光十五年里人金子城等重修采訪冊

陳景沛案曰寶慶志額曰顯靈乾隆志作顯應又

象山志神係唐咸通時人

又案廟碑有神遺詩云關津扼要獨乘乾萬丈冲

霄劍氣寒百行終須由孝立功勳切莫等閒看

孫韓二公祠在助海廟大門西首祀參將孫登科韓未詳

孫號榮菴正白旗人康熙三年任城守參將有恩網戶民

置祀田十一畝有奇爲每歲二月誕辰慶祝資韓並祀焉

乾隆志

忠嘉威烈惠濟廣靈王廟縣西北三百步宋宣和五年方

臘之亂郡邑岌岌賴神助得免邑人於是請立廟後燬於

兵紹興六年重建寶慶志俗呼為大廟乾隆志

國朝同治壬戌燬於兵燹光緒四年監生金錚募捐復建

采訪

乾道圖經鮑郎名蓋後漢節邑人為縣吏縣嘗俾捧
檄入京留家融飲踰月不行縣方詰責已而得報章果
上達審寔然既死葬三十年忽夢謂妻曰吾當更生
盍開吾冢妻疑不信再夢如初乃發棺其尸儼然如生
第無氣息耳具器完潔燈然不滅膏亦不銷郡人聚觀
咸怪神之立祠以祀梁大通間有奴賊名益誑唱誘羣
盜有衆三千號奴抄兵寇會稽永嘉臨海鹽並海郡
邑咸被其害官軍屢邀擊不勝賊勢益張定襄侯蕭祇
為刺史神忽見形因巫語祇願助討賊祇乃施帷帳迎
神置於譙門形雖隱而言與人接越三日告去語祇曰
當以八月十三日破賊奴抄果以是日至拾遺然祇奏
江衆陷於淖潰潰如醉官軍悉繫縛之若拾遺然祇奏

其異武帝遺增大祠宇日以益盛唐聖歷二年縣令柳
惠古徙祠於縣會昌中刺史張次宗嘗撰記皇朝崇甯
二年尙書豐稷奏明州鮑君永泰王廟額犯哲宗皇帝
陵名乞改額內永泰二字爲靈應敕如其請政和八年
太守徽猷閣待制樓异以雨暘順時有禱輒應奏請王
爵加封濟王宣和四年太守直龍圖閣李友聞因陸寇
竊發驚擾鄰邦本州終獲保全繁王之功奏請加封於
是加威烈二字六年侍郎路允迪使高麗舟船安濟奏
請再加忠嘉二字建炎四年車駕巡幸奉敕加
廣靈二字今稱靈應忠嘉威烈惠濟廣靈王
樓扶記畧王姓鮑諱蓋其先東漢鄧邑人春秋鮑叔
顯於齊西漢有宣與兩龔同傳至永昱事光武世爲司
隸王其苗裔也初二親顧天祈嗣母晝寢夢吞日有娠
在胎三載晉泰始三年九月望日而王始生祥光燭室
與前夢協命童名曰圓照既冠美鬚眉容貌秀偉平生
賦性冲粹器度宏遠語言慷慨敬老慈幼恤貧彰孤好
游俠任氣節以擊箠爲樂見山中石以爲
鹿而射之篋中視之則石也因名之爲鹿山

元壇廟縣西三百步小南門內

嘉靖志

潤浦廟縣西一里世傳神漢時人爲邑民捍海歿後祀之

乃縣七鄉之首廟俗稱為裏瀾浦

乾隆志

楊使廟在縣西長營街相傳神誕在八月十六日

乾隆志

三皇廟在縣東至元三年尹張輔建

至正志

元史成宗始命

郡縣通祀三皇明洪武四年以天下通祀三皇為賓郡守

王璉毀六邑三皇廟今已廢

備志

應至翁記天地果何始乎自生人始也生人果何始乎自有聖人始也天地非生人不立生人非聖人不成粵若稽古溟滓初判鴻荒未除獸與人雜人與鬼俱心傷猛鷲目駭罔象無爪牙以搏噬無毛羽鱗介以禦寒暑燥淫結繩不可以久治毛血不可以久茹也時則有若太昊炎帝有熊氏三聖繼作通而變之神而化之設其飲食制其貨財期其物儀作其什器欺能使信弱能使強強能使烹居能使遷止能使行震能使懷暴能使藏獲龜能使烹居能使遷止能使行震能使懷暴能使藏易十三卦所謂前民用者伊誰之力哉後世聖人慕而像之奉而祀之所以崇德報功示民有初也國朝壹函夏仿古制飭郡縣廟祀惟謹於是祠宇被四海輪奐光

鎮海縣志

卷十三

附錄

三

六合矣定海邑隸慶元爲郡重鎮海外衆番所觀聽廟
宇獨缺有司每當祠事卽縣廳署爲壇置方明焉吏民
術製以爲故常牲且弗調裸薦無節神明弗享至元再
改元之第三歲在丁丑六月縣尹大梁張輔字友仁實
來南臺侍御史湖南憲使莊簡容菴公之子清白傳家
之裔端方有守而瞻於文詞優於事業教慰州縣所至
有廉能聲樹碑勒銘先後相望下車以來門無私謁惟
訪聞謠俗人民所便利諸所廢隙不以次興補端緒具見
乃作而歎曰習陋俗愚聞令強趨不示以初未能有孚
舉曠典重崇祀隆棟宇以副上意以勸民庸以鍊邊方
之視聽事不在茲相攸縣東北招寶之陽捐俸繕以爲
之倡內而察吏外而諸司庶職下而士民之好義願助
更費者翁然而應市材傭工一如其直不求豐焉經始
於是歲十有二月甲午越明年之三月廟成民不知役
官無重費屋凡五間地闊若干尺深若干尺門廡則既
底法而力未逮姑俟來者未幾祈薦時事物備有加於
先神人具喜於是邑人謀勒石以垂永久徵辭於至翁
自惟職忝文學不得以材劣辭謹案春秋二時釋奠三
皇禮視大成孔聖之載在六籍炳如日星似無待乎兩
楹之奠而始尊也皇風未泯僅載三墳而百篇之定不
及錄焉使廟祀不立千載而下道何由而尊則夫任茲
事者宜不後於大成侯之汲汲於此知爲政之本矣後

之繼者尚弗替侯之意哉遂序其巔末系之以詩曰厥
初生人泯泯勢勢不有聖哲誰開見聞大哉皇猷模矧
範設功妙造化德昭日月我朝師古設之經祠郡邑爲
一何獨此遺廢與有時循環罔極張侯爲政匪徐匪棘
紀綱旣布治功聿成期返淳風作此廟廷
蠡茲民是儀是式庸示不忘麗牲有石

城外

風神殿在縣城東門外攔江埠街頭建巡道周彥生祠於

其側今賃爲夷居神與栗主俱毀

采訪

周彥記 蓋聞經國教民莫重於禮禮有五經莫重於
祭粵稽周禮風雨並列禮於六宗同爲望祀漢唐以降
有廟有壇壇祀以合廟祀以分郡縣之有風神廟始於
宋大中祥符間祠是有報有祈所以弭害報以昭德春
秋二仲有司祭於壇民間報養止及於廟禮有分合祀
有升降其義然也鎮海爲東浙門戶海潮湧溝漚匯
流履畝縱橫居民奠麗商舶雲集百貨雜陳物產旣饒
生計自足然而非風宣和膏雨不降非風布惠嘉禾不
生非風助順帆檣不張風之所繫豈淺鮮與道光乙未
孟秋月朔風颶告異達旦連朝拔木毀垣瓦壁簞捲海

水起立島嶼動搖蕩析流亡遍及原野余於八月觀察
四明邑令皆已先蠲賑厚卹鳩集鴻啓且請以欄江埤
隙地建立風神廟余嘉其用意之誠警天災而重民瘼
記曰能禦大災則祀之能捍大患則祀之而况風之爲
烈呼吸響應感召其神相與捐俸而落成焉營宇既定
秩祀有常乃溯自風侯風伯風師而以入風爲之配其
詞曰大塊噫氣其名爲風風之所至橫塞大空靜翁動
闢呼吸關通蒸雲作雨拂翠虛紅和調玉燭怒撞金鋪
不蒙曰聖物阜財豐作廟以祀在縣城東梓材樸斲登
築垣墉壁茨丹雘峻宇巍宮几筵既設籩豆斯崇春秋
報賽祇肅嚴恭神其默鑒彙
簫昭融日暄雨潤成造化功

龍神廟在縣東鎮遠門外二里雍正五年

敕封涵元昭泰鎮海龍神發帑銀二千五百兩創建祠宇
八年知縣張珽奉文建造正殿供奉蛟門龍神牌位兩廡
安設雁潭烏沙鰻井桃花釣巖箬雷陳山灌門瀛嶼李家
堰天井峯北雪十二龍神牌位並各塑神像每歲春秋邑

令率同僚屬致祭

浙江通志

欽定祭文

維神德洋洋實海澤潤蒼生允襄水土之神經流順軌廣濟
泉源之用膏雨及時績奏安瀾占八川之利涉功資育
物欣庶類之蕃昌仰藉神庥宜隆報享謹遵祀典式協良辰敬布几筵肅陳牲
幣

李衛記甯波爲浙江首郡其屬鎮海距海十里山曰
蛟門巉巖聳峙環鎮海口潮汐吞吐波濤歟湧最稱險
要傳其下爲老龍窟宅其興雲雨以潤澤生民著靈異
以捍禦災患父老歷歷能道之鍾邑士民屢荷庥應思
欲仰邀

聖恩錫之封號彰厥績以垂不朽余案龍神之績顯於
前代者不具述惟我

本朝順治八年大帥征討舟山戰艦出蛟門風浪恬息
逮至螺頭門忽雲霧蔽空使逆不及備遂破降之其餘
孽蟠踞海島每乘風犯境龍輒波騰浪激俾不得前以
致卒就殲滅是我師克復舟山海疆肅清龍實與有功
也雍正二年秋颶風暴發海潮奔溢浸灌鎮民自分魚

龍矣既而潮忽漸退居民登候溝山望見龍身橫截海中潮因之不能入是時沿海多被漂溺而鎮獨安堵無恙是又爲龍神捍禦保障之功也用允鎮民之籲請於朝蒙

恩特敕曰涵元昭泰鎮海龍神旋發帑金卜邑鎮遠門之東立廟崇祀羣飛跋翼美輪奐焉復於郡屬山川若雁潭島沙鰻井桃花釣巖若雷陳山灌門巖嶼李家壩天井峯北雪諸龍神施惠於民者配位兩廡以廣聖恩均得享祀勿替夫向者望洋以祭疎而不親今則廟貌崇嚴得所憑依且沐封號恩寵優渥龍神之效靈以維護斯土者宜益力豈直風雨以時年書大有而已哉廟之作鳩工於雍正八年四月落成於九年三月郡守曹秉仁來乞余文紀諸石因識其歲月俾後人無忘創始且以知聖主之念切民依苟有利於民社雖僻處海隅而皆不遺恩寵若是司民牧者其亦知所觀感也夫

又包家灣龍神在慈谿界乾隆三年知縣王鈞詳請附祀
匯源潭龍神八年知縣楊玉生詳請附祀聖井龍神十二

年知縣王夢弼詳請附祀

乾隆志

樞密承旨卞公祠堂至正二十六年子朝列大夫卞燾同

知府事痛父名良死王事於巾子山下為立祠作記延祐志

祠在招寶山下成化府志今已廢備志

陳景沛案曰乾隆志誤書二十八年

東嶽行宮縣東北招寶山下嘉靖志宋紹興八年道士季知

孟建元大德六年教所請今額曰旌信朝元宮又陳山行

宮縣南五里宋道士高困明建已廢東嶽行宮縣南七十五

里海晏之穿山元至大三年道士劉尙寬建澥浦行宮縣

西北六十里宋乾道六年道士錢時晦建延祐志又別廟在

東管鄉漢塘市嘉靖志又別廟在靈巖鄉石湫又別廟在大

硤頭下關聖殿之東陳志招寶山下之東嶽行宮

國朝道光辛丑夷毀後捐資建造

采訪

李恭渭記 鎮海東嶽行宮在招寶山麓宋紹興間始建自宋至今越入百餘載矣其間屢經修廢廟貌常新道光庚子辛丑間英人佔定海宮保余提軍爲堵禦計鎮重兵於是地其後英人闖入而東嶽行宮遂罹焚如之威迨收復之三年布政司使理問徐蘭畝奉大吏檄監修威遠城善後各事宜公暇親履其地見夫頽垣敗瓦間已鞠爲茂草怒焉心傷爰是倡議勸捐重建請於鹿陳兩觀察咸以爲可鳩工庀材築室若干楹堂寬室密視舊制有加約費若干繕越數月工竣行宮左側有三義祠三進亦次第鼎新之招寶山巔後有關帝像碑爲戴文進寫其碑陰立相則馬遠筆也吾鄉譚金石者奉爲至寶兵燹之後均歸斷裂徐君若厯求搨本意將重勒諸石此尤盛德事矣獨念徐君厯任方始所著懋績浙之人當歌頌不朽而其經營吾邑先有足志者是不可以不記也徐君名徵江蘇金匱人

正氣堂在昭忠祠後三間供奉列朝鄉先正殉難栗主凡

有專祠暨已入忠義祠者概從畧

采訪

姚燮記 昔陳思王有言曰捐軀濟難忠臣之志也是

惟拳拳貞石槃砥在恆然後攝噴梟行罔避艱澁事刃

建血稜威不磨甘心爲沸鼎之魚飛幕之燕若夫凡燁

陽九上塲下黷熱心纓縛陵滅大誼將以爲桀時之豪

雋耶而獨有人者棘身鄙耆揜目淵潛尙蟬蛻於囂埃

矢煙暖以茹擣冰玉其質在涅不緇之二者尙足以奮

榮播香激揚積俗故嵇侍中之血可以濺衣張仲蔚之

蒿不鉏於徑吾邑自唐置望海鎮以來扶輿東溟勃寇

時發漂鹵之慘按籍可陳曹元思之焚骸陳子華之重

粒其礲礲已其或猥巷管軀榮叨一命責無守城之重

心懷匹夫之仁捶死詭窟戈衛營伏劍雖死之日猶生之

年至於飲江流之清託巖居之闕冠綬來餌韜景益深

曹放齋著書不赴奸召劉夢軒種藥苦如儒生砥狂瀾

之流棲浮雲之志於是師潔者謝塵械繼躅者汎虛舟

抱素居貞惟其選也以忠義如彼以介節如此而令其

墨陽授首長飄瀚海之魂春蕨奉芳莫表西山之恨亦

誰之咎歟邑人士乃新邑東城候濤山下僧廬曇鄂堂

故址奉粟上合祀之凡有專祠暨已入忠義鄉賢諸祠

者概從畧簡而無蓋信而有徵顏曰正氣蓋有取乎湘

靈之騷與文山之歌也嗚呼青天終古愴招搖之不芒

白雲在空慕飛鴻之奚弋爰系以迎送神之詞曰陽耿

耿元精符澤有如衣何需翻朱鳥光白榆六合坦心無

嶼向築築爲驕吾彼莽莽皆蟻輸阮之隧鑒之隅拭鉅
嶽吞鴈鑊一寸地丹腦塗礪堅石何徭徭任所尙鮮有
踰大布袖清風俱崇而遊瑩其持外萬物厠僕痾汰咄
惜歸恬愉崑山姿姣以姝集椒庭軒霞僑人綱植天常
扶卓煌煌揚殿殿蒼虬翼旌元龍抱松箕騎斗旁來盱
運際龍戰開黃虞柴燎夾廟牲當除恒茲肸蠁昭靈孚

附粟主官爵姓名

宋起居郎秘書少監陳公茂

宋承直郎楚州錄事參軍贈通直郎曹公孝先

明梁公良用

明中書舍人梁公良玉

明中書舍人梁公中節

明刑部郎中梁公田玉

明梁氏父子兄弟

明工部郎中張公安國

明中書舍人郭公良

明正千戶陳公睦

明衛指揮使艾公敬

明衛指揮使劉公隆

明布衣楊一公

明定海衛百戶劉公夢祥

明增廣生戎公良翰

明布衣姚公思敬

明定海衛軍葉七公

明舟山所百戶邢公國泰

明舉人順慶府同知贈尙寶司卿洪公應科

明定海衛百戶贈都督僉事陳公大綱

明諸生襲指揮使陳公應鵬

明衛指揮僉事贈指揮同知樊公懋

明邑庠生吏部郎中張公鳴喈

明舟山衛所百戶陳公表

明邑庠生贈檢討毅烈華公夏

明邑庠生謝公泰階

明邑庠生艾公達時

明邑廩生謝公泰臻

明賢良方正陳公昌統

明義士胡公沛

明副貢生鄭公端明

明選拔貢生候選同知邵公似歐

明歲貢生孝定先生薛公士珩

明邑廩生邵公似雍

明布衣范公兆芝

明布衣陳公王賓

明布衣周公西

皇清咸遠將軍陸公定國

皇清儒生張公君旨

皇清義民鄭公道馨

皇清石浦營守備世襲雲騎尉劉公朝元

昭忠祠在東嶽宮側

國朝咸豐四年甲寅八月落成祀殉難制府裕謙總兵謝朝恩縣丞李向陽把總金璽祔以同時本營外營武弁兵勇陣亡者勒碑記事提督善祿創捐耆民倪本堦等十二人勸捐建祠每年逢八月二十六日爲裕謙殉節期醵錢祀焉正室三楹祠前東西兩小室設陣亡兵卒粟主祠後向北三間曰退思所東北三間曰正氣堂基址長方形南北縱計二十三丈四尺東西橫計四丈三尺祠東地七尺

爲堂之出入處西南祠旁餘地橫計五尺西北傍正氣堂

餘地橫計一丈六尺

宋訪

姚燮記

道光二十有一年歲辛丑八月二十有六日

海夷陷鎮邑

兩江總督裕公謙海南狼山鎮總兵謝公

朝恩邑把總

金公璽丞李公向陽殉難死士民欽其節

建昭忠祠於

邑東郊招寶山之陽配以同時兵弁與死

者禮也徵燮爲

記丹諸石俾後之謁祠者有考燮惟明

存亡之義者無

臨難苟免之心死社稷則祀之爲曠代

不易之典故張

長史睢陽之廟附以許南楊節毅成都

之祠從之史郭

疾輪官忽雲旂往來囊櫛旣崇精爽斯

託已聿溯英吃

黎之肆逆擾我海疆者數年龜茲不臣

陸渾抗命鯁方

驅於粵海稀復突於浙東大奚之殤未

招西蘭之潮已

血馬校尉不作誰馘羌無弋之頭李總

管已歸孰斷吐

谷禪之臂先是庚子春

天子震怒齋宿

卜吉

命我兩江總督

臣裕爲大帥

賜之節鉞

授以機宜

諭其馳驛

明州急爲剿辦蓋李崇深沈素愜民譽休璟

諳練久爲

鎮海縣志

卷十三

上知也甫下車鎮邑逆夷乘未備遣酋長以詭詞餉公
公不聽縛酋懸諸竿射而剗之夷懼揚帆逕焉李廣射
匈奴之騎上郡危解柳玼剔蕃人之尸臨涇寇遁法令
必伸

天威乃著誓以霆激電掃一揮盡殲上抒
宸憂下蘇民困倚盾草檄目攝海隼枕戈茹藥夢騎天
狼故公之在鎮者一載有奇剛而能廉肅而能峻敏而
能斷營而能周與將士同苦甘於賞罰昭明慎而束浙
之民方將從章孝寬以北祇臬諱夜神州之陸欲沈昌國
雲走天敗軍之氣以非祇臬諱夜神州之陸欲沈昌國
再陷三鎮授命遂使符堅驍橫長驅而逼郢城龐萌燄
張引軍而闕泗水公乃登陴數馬升壇歆牲而孤城之
懸已如卵危羣志之怯復同齟齬河橋之旗未折潼關
之騎多逃崔將軍稱上閣勛臣竟拔寨而退奔烏鰐嚴
縣官本刑餘下走敢棄輜而遠出平陵搗搗然如朽拉
枯摧紛紛者類狐鼠竄鐵鴈傾而黃流夾石車發而
赤纓飛而公於此既難為王陵之誓天復莫效李廉之
禱火傷哉朱鳥促零丁欲墮之魂嗟此青山仗建業房
軍之守時維餘狼山鎮謝公固壘金雞獨當一面待鑒
凶門而出下有顏淵欲屯高砦以防上無險壁廣固之
援兵已斷平涼之襲卒方騎七十創被於一身三十里
難為退舍遂使崢嶸溫序類朱循之之在園可憐抗慨

虞性與譙王承而同志蓋把總金公佐謝公以拒戰同
被害於時也嗚呼吳越防天吳肆虐廢耆者片刻飛
駁雲崩麟藉者千人暴骸阜積鄉使謝公者手能砥柱
力可迴瀾遂孫恩於決日磔下彪於巾山十次闔而十
盪闕廓清暈月之氛死地生而危地存抵阨阜關之隘
奚至宋金剛之隊不去汾州何無忌之師竟踰桑落是
難望也殆有天平而裕公於此以爲大局如斯藐躬奚
屬掌握已無寸柄左右不過數人忍寄活於亡命兒之
肩敢受盛於操觚家之筆因爲之冠裂裳豎面北拜稽
仰天蒼蒼呼臣負負鞭刀已失爲之冠裂裳豎面北拜稽
皇天危心以堅白素車未眇逝從子胥而遊清流一泓
往攬靈均之袂則公之投池以殉也其屬官負之出匿
於舟江行抵姚邑公既蘇卒仰藥而死嗚呼大星其隕
標風不迴歸命無渝全操罔玷縱先軫之元未喪毅何
滅於易雄謂常山之舌故存烈終過於來歙
賜諡清節卹典有加而公復何憾乎若李公一丞耳非
有守土之責者城旣陷升堂自縊
上閔其節贈以五品銜並蔭其後如制則又碩果蒙泉
無愧於疾風勁草者歟從容含笑顏色如生白水鑑之
清赤眉望之避霄不必辭祭酒龔勝無負於國恩官不
必居侍中庾嶷早辨其一死猗彼策驂驪健馬挾印西
逃伏輜輶輕車摘冠南逝者胡不聞焉警悔焉慙也嗚

乎二十年縣尹名騫棧豆之駒一萬里昆州路絕浪穹
之雁又足哀已足宜聖素螭之壁藻文杏之梁魏神輿
出入之門敞仙舄憑依之座饗祀不忒灑掃維虔集紹
宗許穆於一堂英風可挹麾渠勒烏菴於境外瀚海長
清聊仿蔡伯喈之撰詞以備范蔚宗之作傳將天地疑
之正氣星嶽無遷亦山川澤以忠魂雲雷皆壯也祠經
始於咸豐二年歲癸丑六月越歲甲寅八月始落成費
緡若干皆獨自邑之好義者具詳碑陰有足徵已系之
以銘曰秦壹上壘秦媼下妾而以降生至元無形返爲至
貞貞珉太璞貞樹冬青地軸何朽天柱何傾茲宅而監
茲形而聲襄

皇郅治福民太平設裳在庭懸弓在楹有
鑾有銅載管載蒸浩乎萬古視此東瀛

附栗主官爵姓名

欽差大臣太子太保兵部尚書南江總督靖節裕公謙

江南狼山鎮總兵世襲雲騎尉謝公朝恩

廣東署新安都司世襲雲騎尉程公步韓

護理金華協提標後營游擊世襲雲騎尉重公祥

台州協左營守備世襲雲騎尉李公雲龍

甯海營千總世襲雲騎尉陳公慶三

黃巖鎮標左營千總世襲雲騎尉王公萬龍

鎮海縣縣丞世襲雲騎尉李公向陽

鎮海營把總世襲雲騎尉金公龍

浙江提標中營把總世襲雲騎尉岳公永泰

黃巖鎮標右營把總世襲雲騎尉解公天培

同仁堂在昭忠祠東牆外二間列總兵牟大寅知縣王夢

弼李壽榛恭將沈鴻憲劉光明栗主恭將沈鴻憲撥鎮隅

六畝後所提標右營附城營曠田十五畝四分又撥招寶

山麓礮臺下魚漕營隙地各一方

招寶山麓營地址界東至礮臺下除臺基餘地

四弓外計七十八弓五分四釐西至虎皮塘計四十八弓

五分三釐南至東門衙頭石路計六十三弓二分八釐北

至招寶山礮計六十三弓二分八釐以贍春秋祀事倪本

合數共計拾陸畝七分五釐二毫

采訪冊

局四圍曠地壹百五畝移縣立案以益祠祀之費

靖海營祠在東北城外二里舊名海神壇正德時改祭江

亭嘉靖間都督盧鎭展築營堡環二百四十丈增建舍宇

六十餘楹爲海口屯戍祈祀海神之所因名

嘉靖志已廢備

都督盧公祠在縣東北二里明嘉靖四十一年爲都督盧

鎭建

浙江通志

翁大立記都督北山盧公樹勳海上五十餘年矣公
以年踰七十請老於朝上方以趙充國馬伏波注公未
允所請而濱海士民恐公一旦懸車亟謀肖公貌爲祠
尸祝於是定海令何君愈以士民之意來請予文予與
公共事數年蓋知公者莫予爲稔乃何君則曰公以鎮
守總兵開府定海視招寶屹立東隅襟江帶海爲明越
外戶誠壁壘其上建牙耀兵則舟山烈港馬蹟長塗諸
山基置星羅發兵游微指顧間耳遂壘石爲城署其名
曰威遠其下爲轅門又卽並海竺山各鑄火器若干座
而以戰艦布海上表裏數重經畧規摹偉哉遠矣用是
倭奴震恐無敢窺我明越今年突南洋者公又督兵邀
之斬馘數百級時方尙公長城而公忽言去故有是舉
予曰君所謂知其一未知其二夫將者以正設險以奇
料敵國初制禦島夷宣威海徼惟湯信國善用正劉廣

甯善用奇公兼有之是以海外諸夷憚公威名已非一日
今君所言正也以予所睹記又何其奇哉昔歲甲寅
渠魁蕭顯據巢上海我兵遇之輒北予時以參政督儲
蘇松諸公援急公部兵千人布爲七哨以善伏者持火
入巢中公麾前哨稍卻賊意公卻空巢檣公轉額間巢
中大起賊俱失據循海而遁去追斬敵千級勒兵還
城于盛陳金帛牛酒犒師公以次頒賞被創者揮涕吮
之衆益感奮予乃促公追賊公曰未也賊創甚必日行
數百里我兵躡之追不得食是兩斃也被見我兵不追
當入蔡江空壘中而延殘息我問道囊之釜中魚耳言
訖忽縛百夫長一人前跪數之曰爾運令不前罪當死
卽斬首以殉衆爲股栗已而謀者果如公言公至蔡江
架飛橋數里中賊并力向我我兵已掩其背因壘上矣
賊大創創利有遺俘奔海甯廿里亭公度賊飢甚遣人
詐爲亭長炊飯酌酒輒先嘗以弔之賊果酣臥夜乃縱
火悉從殄滅歲兩辰有賊數千百掠慈谿突咸池匪將
窺我姚江矣兵憲許君就子問計子乃致書於公公果
選善夷語者數十人被服作倭奴狀操漁船持烏銃而
來令許君盛陳兵西許給倭奴曰官兵甚銳我雖得舟
無能濟也出沒荏苒間以銃掩擊賊啞啞道死者甚衆
猶以爲許君飛擊之不虞爲盧公也卽日驅出海公已
伏兵五峙洋中俘斬殆盡歲丁巳叛酋汪直引倭奴千

餘突入岑江求互市遠近聞總督梅林胡公檄公同
計公乃親詣賊所謬為推誠先給其假子毛烈納款軍
門胡公亦如計延見榻前昭以重利遣烈還報直果
束身而至遂成擒東南禍本自茲剪拔以斯三事觀之
奇矣又聞公雙嶼江王江涇金塘山白水洋三升沙等
處俘斬大捷其事尤奇他如初傳烏銃以為中國之長
技創設乍浦兵船以為浙西之雄鎮尤為萬世不朽之
功嗟乎公身經數百戰前後俘斬萬餘級海上之勳無
踰公者昔信國封公廣甯封伯朝廷今以兩者待公公
胡遽言去也公名鏜別號北山以處州衛指揮起家其
子相有父風臨陣身先士卒嘗擒賊酋辛五郎以功授
處州衛世襲指揮僉事尋擢儀真守備父子一時豐功
偉烈照耀海內亦古今之兩難得者歟

總制胡公祠縣東二里威遠城內明嘉靖三十八年邑令

陳正道建祀總督軍門太子太保兼兵部尚書胡宗憲

志

又別廟在邱洋雁門嶺下

乾隆志

張時徽平倭記 皇帝臨御之三十一年載歲在壬子倭
寇越境肆掠郡邑大駭當事者紐於恬嬉按兵觀望莫

有發一矢以捍賊塵者皇帝赫怒爰命元戎秉鉞虎符
四發材官雲馳亦罔克鷹揚蕩滌妖氛失律喪師坐吏
議而齒劍者踵相接也皇帝曰否是大辱國何以師爲
盍擇才御史夙著風猷者往監督之其可梅林胡公實
來選徒簡相率先戎行兵威不振數以膚功上奏闕下
皇帝嘉悅屢降綸音錫之爵命不二年而進巡撫與總
督公感非常之遇厲匪躬之忠揮金募士設畫宣奇蓋
無日不計於軍實往往披甲戴盔決生死於鋒鏑之間
戮其左次與不用命者於是三軍震厲人百其競有乍
浦之捷有龍山之捷有仙居之捷有王江涇之捷有沈
家莊之捷有柯橋之捷有舟山之捷其餘逐北追奔窮
搜而掩擊者不可勝計賊益望風慄魄乃歲丁巳叛人
汪直挾諸倭酋以來詐言款邊以要互市包藏禍心伺
我備弛逞其毒焰公預洞隱伏因其間而用之陽示羈
縻陰遣里中素所善後者誘而致之麾下納於園棘疏
請躬提師旅盡殲餘孽賊既失桀魁計出無何乃遁入
岑江幸緩須臾無死岑江固山海奧區也天塹凌空叢
箐蔽日我兵環而圍之水連鰲陸伏獵虎盡絕其薪
粟之路於時又有他寇糾聚死黨虎瞰鷗張航海來援
氣吞溟渤公曰賊鋒甚銳不可遲也逮其未合而誘之
此成擒耳乃使間諜給之曰直方互市若等亦有所利
乎賊疑信未定遽以偏師襲之一殲之於普陀再殲之

於朱家尖無一人得脫者賊用大怖悉火其輜重潛徙
於白泉益聚榛莽斷塞徑自謀治舟以逸無復逞志
乃挑選精銳分爲數軍迭出而肄之賊困不得休飢不
得食相枕藉以死其餘孽未盡者乘濤夜遁諸將奉公
風戒伏兵四集追而擊之斬敵若干俘獲若干海波澄
清疆境甯謐露布星馳捷書上報道路歡呼曰庶幾復
見天日矣縉紳士大夫交相慶勞歌頌興焉某屬公知
愛觀此盛美不啻身親爲之爰矢厥詞用章大伐公自
戊午三月視師海上迄十一月乃罷而定海實惟駐節
之所維時巡海副使譚君綸郡守周公希哲命邑令陳
紀陳正道勒石招寶之巔以昭於永永其祠曰皇祖開
基九服咸熙放牛歸馬守在邊陲十聖繼統風恬物嬉
外國來賓惟德用綏民戎羌國貢有常期物大蠹作防
久斯絜茲茲狡寇擾我東隅神州鼎沸羽檄雲馳帝命
中丞仗鉞視師臨軒推轂假爾便宜翼翼中丞奮揚武
威胸中甲兵百萬熊羆宣奇決勝迅若風雷屢戮鯨鯢
京觀封尸殊方震疊反側懷疑直爲叛首稱款來歸要
我互市乞我望書滔天大愆匿於甘辭電燭其奸多方
竊靡誘以間謀解以金緋致之轅門繫之牢之餘孽未
靖險阻海隅岑江旣破白泉是遁如魚在釜喘息斯須
礪我戈矛簡我車徒分番掩擊鼓將拏旂羣醜魄獸
駭禽飛乘濤夜遁偷活庶幾號令孔嚴伏兵四馳犄角

窮追靡有才遺海波不揚妖氛悉除農歌於野商謠於途孰剪荆榛靖我郊衢孰施乳哺鞠我孩雛乃室乃家以耕以漁恒燔屹屹岳嶺輝輝誰為此者御史大夫皇皇神武赫赫廟模社稷之衛天子是毗光輔中興周虎商伊帝曰汝嘉錫爵分珪太史作頌勒於鼎彝

郡守沈公祠威遠城內都督劉顯重建祀前郡守沈愷嘉靖

張時徹記 招寶山故有太守雲間沈公祠云以兵興燬已而倭患殄滅海宇甯晏岷黎報功乃祠胡令公乃祠海道譚公踰數年乃祠今都督劉公顯用鄉之縉紳先生及長老諸生議復祠沈公祠既成小司馬范公欽憲副錢公嶧別駕包君大魁參軍包君大中郡縣諸學生盧子叔麟沈子明臣十數輩儼然造焉丐余文碑之謂余嘗主復祠議且知公治狀甚悉余雖不文所以復祠之議不可不使之章白於世故不讓而為之碑曰余於沈公之守甯甯也有餘思焉其去甯垂二十餘稔謳歌於五邑者猶一日茲記可以倖微乎其祠於甯者三蓋皆報當時覆露之德也惟茲寶山之祠則尤不可已何則昔霍氏之謀漢也當其事未發時有茂陵徐生上書

言之宜少抑制帝不以爲然後其勢漸逼其謀漸著然後力起而誅之乃大封拜其告奸者曰焦頭爛額爲上客曲生不與焉故人有爲諺以聞者曰焦頭爛額爲上客曲突徙薪無恩澤乃始求上書徐生賞卯之間漳閩之人今茲舉也得無似乎當嘉靖壬寅癸卯之事故有然者而與番船奸商貿販方物往來絡繹於海上其時邊氓蓋亦有奸闖出入者公方爲厲禁犯輒置法律無遺誅矣適武人有欲伴功者以虛聲鼓上聽當塗柄兵之人亦皆好爲生事輒議兵勦焉公獨憂形於色上議沮之其略曰海上之患方以番船爲公獨憂其然其所欲不過與地方人負販貿易務違禁網物取息幣耳自愷任事來問死刑軍徒者不下百數十人今亦稍稍輯矣然通番非盡從逆之人番貨非卽殺人之物通番下海雖在不原各有定律要亦未應盡誅也今亦不問所從來槩名曰賊違爾兵之恐非所以協議安衆也夫六月行師兵家所忌師出無名事故不成今海上船止六七達興大衆卽發軍衛巡司義勇漁船盡民以逞萬一無良竊發嘯聚山谷亦不知何以應之況海船非我敵明甚我衛所哨軍要皆貪生畏死之人綿力薄材不諸戰鬪往歲倭寇再至徵兵應調逗留不進諸號爲統領率皆立馬股栗愷出死力調度幸而散去且軍衛世受國家豢養顧不能奮一旦之力有事悉委之義勇漁船夫義勇乃市井

之徒漁船皆網罟之輩平日既無祿於官又無忠信之
結一旦驅之死地其能不舍舟而走者幾希且海船利
於水戰步騎利於陸陣此不待智者而後明也辟之飛
鋒有毒來則撲之入其巢而擾之無乃甚辛整之禍乎
且其懸隔海島豈能飛渡橫行爲今之計合無明示憲
諭道之禍福速之出境上也其次莫若督出海官兵於
關津要隘之地嚴爲防守不得登岸地方姦販之徒不
得下海則糧盡計窮自然遠去如有探知來歷陽爲防
禦陰與交結縱者依律治之則慎重而威不褻令行
而民不擾矣檄職司民社恐平民無故緣兵以死萬一
差跌則損國之威示人以怯彼將肆然無忌厲階自此
長矣愷不敏不敢不冒死言之其官軍果有能出奇定
畫不費府錢不擾窮民主擒於海獨立偉功此又不當
以常格論者議上當事者不聽遂出師衆果大潰海道
公僅以身免其後番舶如汪直陳四盼許二輩輒露刃
坐葉舟直入定海關要索酒米牛豕諸物貨而有司一
不應輒大譁不已蓋不三四年而東南之禍起矣使當
時用公議不輕出兵以挑之惟一意修內治彼必畏懼
不敢動豈能盡知我虛實肆然無忌如入無人境耶乃
今祠胡令公矣祠譚海道矣蓋焦爛之功靡弗酬也而
曲突徙薪之策公實有焉茂陵徐生之賞可後乎不可
後乎禮曰先王之制祀也法施於人則祀之若沈公者

謂法施於人否耶祠在譚公之後而胡祠又後數十步
祠之費實出劉將軍別駕方君渠以視篆定邑與有力
焉定尹魏君尚大適至共落成之系以詩曰寶山崔巍
殿大邦海隅之東瞰扶桑飛雲臺三公堂前譚後胡
公中央公來刺明二紀強德星垂耀流耿光海氛昔起
自微芒我公炳幾灼先防黑風黯慘吹機槍武人傲公
孤矢張公乃奮筆騰言昌上議不聽尸橫僵鯨鯢從茲
恣跳梁東南血染山河長天子赫怒胡譚揚波甯海定
煙銷狼公言得用無死亡公言不用罹禍殃追公祠公
獻蒸嘗願公鴻名垂大荒廟謨國祚永無疆千秋萬
貢越裳公祠奔奔海決
決三公騎龍共翔翔

海道譚公祠縣東二里威遠城內嘉靖四十一年知縣何

愈建祀巡海副使譚綸嘉靖志

張時徹記天下之患莫大乎倖視不虞而操執恆算
者不與焉故入虎穴而握兵涉江河而腰弧此其事易
明而其難易詳也乃若河崩於蟻穴而火灼於突薪卽
才勇鮮不困已嗟乎非神智孰能辨此者乎東南倭寇
之患起於積屈是河崩而火灼者也當是時羽書興馳
烽燧電掣材官技擊遍徵於九域而失律喪師者踵相

接也天子憂之博咨才碩以任驅馳而梅林胡公實專
節鉞時則有若巡海副使譚公綸文武兼資有若都督
同知盧公銓居嫺韜略固三軍之魏虎而海數之長城
也狹同仇之義入則孺籌帷幄出則率先戎行旌麾所
指折醜若遺驅露布而奏府功者蓋未可一二數也已
而相與議曰夫孤矢威暴金湯設險古先聖王豈其棄
德而逞志於武哉捍疆於未濡誠知保不啻
平遇亂略非此其道無由也又況狶奔狼突擾擾之交也
者哉今夫定海海甯縣區蓋鯨鯢之國而烽燧之交也
招寶實奠其區則江海之咽喉而郡治之門戶也去縣
城百武而近賊如登而據其上飛礮其下則縣城甌
碎耳卽寇船尾卸而入亦何以制之語有之曰百丈之
山而跋牂得遊其上五丈之城而窺其意裁於胡公公輒
戰守計者宜莫如城招寶便乃以其意裁於胡公公輒
報諾十日鳩工塹隆培圮開鑿山道二百餘丈爲雉堞
一百六十七爲東西門二上構樓櫓爲海神祠下爲戍
屋四十餘楹爲架放發貢厥二力取於軍隙財取於漁
稅而經營歲率則虛公實肩之工始於庚申春凡三越
月而告成屯戍卒其中扼海口以壓敵衝與縣城蓋唇
齒攝也其外益兵營布戰艦諸威敵物器靡不畢具賊
人卽鳥舉不能度也於是文武吏士歡騰鼓舞以爲更
生之賜乃爲祠以祀胡公已復爲祠祀譚盧二公羣飛

鳥革煙霞出沒於叢棟波濤翔舞於簷楹眞世所謂瑤臺貝闕也縣尹何君愈身保障之責戴芘翼之功而始終宣力爲多乃又屬余文以章鴻鴈伐則應曰斯役也余蓋數贊其事云何則圍之卻雞豚也不恃童奴之瓦礫而恃樵櫟之卑樊家之禦猛獸也不在操戈負弩而在四周之屏故苞桑繫泰復隍成否此其道則然耳濱海之區其爲要害也多矣國初建設塾堡調兵置戍蓋種種悉也承平日久積以玩怠率廢棄不講矣始議所編者又莫有出一算籌之卽籌也亦莫之爲理諸阨塞便利賊皆得規而據之而我望風喪氣倉皇驅蹙卒以嘗銳鋒庸能格乎故賊少入也我則小衄大入則大衄非惟擊闕之不力亦其所乘之勢然也乃如采濤江如川沙窪如劉家河如舟山如岑江如柯梅諸所若先賊未入扼險置戍賊惡得據爲巢穴至厓大衆久而不克乎然彼猶守在藩籬也招寶則門戶矣無招寶則無縣無縣則無郡而可弗亟乎茲城也狡寇竊謀岷黎安堵功德於吾民至宏遠矣兵志曰上兵伐謀又曰善師者不戰其三君子之謂乎祠而祀之夫誰曰不宜已而巡海副使劉公應箕鑑至閱武犒士升高縱覽謂盧公曰扼險樹防斯策之上者乎余與公當圖所未竟矣乃系以詞曰赫赫王化靡迹不流薄海內外控如綴旒蠶茲醜類不分爲藩播我積聚敗我來牟圍掠貨貝是任是舟

華都麗宅鞠爲墟邱皇帝赫怒簡茲壯猷矯矯虎臣公
侯好仇乃膺推轂秉鉞紆籌矯乃弓矢礪乃戈矛旣折
其醜復執其酋膚功載奏皇是用褒帝曰勞之臣曰罔
休維茲招賁維郡咽喉易扼之吭曷伐之謀乃城乃堞
金湯是侔威彼不逞億萬貔貅鮮我遺育林舞道周撫
我黔赤菰我田疇伊誰之賜剏模孔修二三沅戎是度
是鳩無患不燭無言不酬新宮奔奔令譽悠
悠何以報之乃黍乃羞何以戴之百千斯秋

報功祠在威遠城內凡三間左間祀明太子太保總督胡
宗憲都督同知總兵俞大猷太子少保左都督戚繼光巡
視海道副使譚綸郡守沈愷右間祀明都督盧鏗

國朝浙江提督壯烈伯李長庚

寶山志

案胡盧譚沈四公本有專祠分建於威遠城內傾
圯之後附祀於天王殿道光二十五年邑令黃維
同建此祠以祀四公并俞戚李三公合祀焉

天后宮在招寶山下元至正十六年建

嘉靖志

歲久傾圮

國朝雍正十二年參將張兆龍候補守備張君佐主議浙

閩商人重建於南薰門外基地係邑生陳學詩捐乾隆六

年紳士李士瀛等請於知縣楊玉生詳請咨部每歲春秋

照龍神廟致祭又別廟在崇邱一都竺山下

乾隆志

又別廟

在威遠城望海樓

陳志

聖妃宮招寶山下一在陳山一在

石湫一在澥浦

簡要志

案康熙二十三年後海禁既弛閩粵商賈輻湊海

中屢著靈異神姓林氏興化莆田都巡君之季女

生時神異能力拯人患難室居未三十而卒宣和

五年給事中路允迪以八舟使高麗風溺其七獨

允廸舟見神女降於檣而免事聞於朝賜廟額曰
順濟紹興二十六年封靈惠夫人嗣封靈惠昭應
夫人又封靈惠昭應崇福夫人淳熙十一年封加
善慶二字宋自靈惠封十五次延祐元年封護國
庇民廣濟明著天妃詳見鄞志程端學記

昭利廟縣東北五里宋宣和五年侍郎路允廸給事傅墨
卿出使高麗涉海有禱由是建廟燬於兵紹興五年重建
寶慶今圯乾隆志

羊府廟南薰門外祀唐刺史羊僕晉志

國朝嘉慶二十一年擴基重建陳志咸豐五年里人朱傳

訓等募貲重修廟前舊有池傳訓等濬之欄以石居人賴

焉采訪冊

財神殿南薰門外與羊府廟鄰采訪冊

張相公殿南薰門外唐令志祀宋太傅張世傑咸豐初年里

人王楚國等募貲重修采訪冊

瀾浦廟南薰門外在張相公殿內同治七年里人重修采訪冊

冊

龍王宮南薰門外祀東海龍神嘉靖四十一年海道宋守

志都督盧鑑知縣何愈移建威遠城內更名海神祠

國朝康熙四十四年海神祠燬復移像原所乾隆十四年

七月颶風祠圯十六年正月重建今呼老龍王宮乾隆志光

緒三年里人重修采訪冊

顧公祠南薰門外祀明知縣顧宗孟

唐令志

辭三省記今令所稱爲民者非少然多自爲名有善
惟恐不揚及已去又惟恐不傳誦德之石歸然道周遠
愛之祠奕奕相望此寓盡若峴與桐民所不能忘抑或
有窺其微意巧爲附和者也故今於去留之際能無意
爲民者斯已難矣况民實有其意而能介然持不辱以
爲民如我顧侯者眞民父母也侯蒞邑未期當事爲疏
調繁仁和會仁者和令已前選不果調而邑之民則恐更
有繁邑復借侯仁和不徙是爲何名而重辱我訊得主名召
侯詫曰吾不遷不徙是爲何名而重辱我訊得主名召
數而健之已卒伍詳賴侯撫定而臨觀更幸完德侯不
已號衆築址江詩謀祠侯侯呼與語若輩不聞律禁任
內立碑耶若愛我何乃貽我譴久之諸生復謀梓侯政
侯聞正色拒之曰吾愧不德耳若有之民豈無口而借
舌於木重之災也蓋侯之無意爲名若此然其名績實
建不朽侯已去彌見思侯爲樹石寅賓館紀德而意猶無
已更卽城之南俯江而祠貌侯像祝屬余記謂侯在邑
余適里居其善狀非余莫能悉也侯材偉識沈器宇凝
定守介而思密遇事敢任然不喜因事立名每踵前美
緣飾成之自非所不得已與所可垂久遠不輕革故及
意所任雖當事不能撓已邑僻小而宿重兵歲時當塗

范師供億繁苦百姓積思息肩不可得會邑多沒產前
令黎侯請以十三爲貯器雇役費蘇民困緒未竟而以
憂去左右者乘侯初至以爲不便於官多方消之侯順
民欲持之力更爲增補所未備令可久雖已去猶未忘
梁荀之恤惟恐或更也邑賦往多宿蠹及黎侯創爲徵
比法守籍者無所施巧數有異議侯一切循故併期會
亦時弛以便民及大籍田賦日察手警飛詭之弊盡絕
更前所未覩也邑河渠西達慈者濬自時侯西南達鄴
者濬自丁侯歲久且淤而大江以南則兩侯亦所未及
也侯因旱爲併濬而盡地分維員督之慮其漁民而給
日供甯少餘及河通而百姓更喜爲不擾蓋侯壹意造
民不以塗耳目論語所稱先勞書所稱無違拂者皆兼
有焉嘗旱祈雨積旬日不應民意亦倦劇因少濡輒罷
禱侯謂如此何以望秋更禱龍百里外必得澍乃已其
禳醮乃上下往來餼糧皆官爲給蓋自侯在邑未嘗少
費百姓銖粟之供也每嘗簡劾雖道遠不爲預期第隨
事之暇與道之便以命前驅猝出不意多得事情蓋侯
性警敏凡人貌與姓名及筆蹤一經目輒不忘每所摘
發如神明然未始刻爲洗索惟御左右不少假率得譴
去餘亦兢兢以引退爲幸諸曹既空舍至徒隸直不給
役矣往鹽販受官符者率倚捕爲姦利符日壅侯熟念
販惟苦符刻日故令捕得操權乃寬爲期視昔三之而

後更符於是取爭受符不數月符積無幾者侯更為寬
期者五之符遂一日補無所得利蓋侯善心計其約
束下多此類不盡文未嘗市縑帛即所需布素皆平市
日供不過錢數十文未嘗市縑帛即所需布素皆平市
或偽增亦隨給不問也邑人因相戒無欺侯云徵科
不少羨半錄守藏吏自輸解費無所出侯應曰錄錄而
稱至兩必有贏毋容憂聽訟日無留贖悉手奏成絕不
輕罰侯積穀日額恆不足及哀乞又併為蠲貨率膏他
經費及捐市僧稅補之蓋侯遇民如此而於士則少遠
嘗曰士猶憂也近乃緣人自勒期望講業程藝外不令
得私干乃身家所關又未始不以情恤衡士隨一日短
長不主宿評淹土獲品題以知名者眾故無問見識不
見議皆服侯善造上而二百年來邑亦若再造學宮之
頤者完縣衙之朽者隨者創廣寅賓館之隘者敝威遠
山城與大嵩所城傾圮者繕且建即東隅古利亦為經
費惜行達不及視成其餘工小者不勝數邑皆莫知費
何措與工所由按此皆他令所難侯則不自以為難也
其所難蓋在獲上方伍譁時實先有所激因借援邊發
憤勢橫燎不可遏時主者意示威顧洵剗無誰何會侯
身自撫解疑若市德以為名及給行糧前後數貳令以
難侯侯竟行意使行者就道邑獲安而餘伍亦賴以
安郡嘗檄侯權開稅侯以為汚不屑也及不可謝則惟

務寬商以招來商船日廣至甫二時常額外得羨五百
餘金侯悉籍上郡郡亦矜名不私入侯所爲得藉籍學
宮以此余憶往邑有閒田二百餘畝守欲盡益郡學時
黎侯力爭懇割七十畝爲學田初非郡所得私有也有
如侯扼郡之橐而奪其私以爲公此非絕意獲上胡能
無少顧慮焉余故曰難也余聞侯行日攀卧於道者千
萬人各以僑伍釀錢奉幣進革屨乞爵故所御縣示去
思侯麾謝不能得免爲受屨以答其意遂積至百盡以
畱邑藏中或曰侯將以爲將來侯聞之笑曰吾雖欲攜
之而不能盡攜故置之以示將來侯聞之笑曰吾雖欲攜
一錢而復投者何以異又侯嘗畜雙鶴麋鹿亦畱置邑
併爲著之以並於挂服捐駒之誼焉侯名宗孟字嚴叟
蘇州吳縣人萬曆己未進士是冬十一月蒞邑天啓四
年冬十月以計行隨徵入御史臺今以終養歸里祠成
於行之明年又明年余歸而以士民之
意爲之記則天啓六年丙寅冬十月也

報恩祠南薰門外祀明巡撫劉一燝御史李邦華副使秦

道顯知府楊鍾英知縣王本祥邑紳邵輔忠以官辦上司

供應器具免坊民承值之累立祠祀焉邱府志今圯乾隆志

陳景沛案曰邑兩汛上憲按臨苦於供應會有王
姓充織造以賄敗時光祿邵公家居劉撫軍等按
定請沒贓銀爲置器貯庫供給坊民德之

李公祠祀前營游擊李汝能在清川門外裔孫宅內裔孫

國珍世守其祀

陳志

浙江水師左路鎮標前營游府李公德政碑記
公諱汝能號桂吾陝西榆林衛官籍其頃曰伊惟我公隴西
將選橫梨橫江金陵屹翼常辰奏曰滇黔邦殷舊淮蜚
聲蛟津帝簡元老壯猷冠冕諸弁偉略覃敷威名遐扇
虎口口口鯨鯢席捲洪波口若閭左歡忭挾纊投醪恩
膏普徧細柳口口荻苻革而對揚王休誕膺
宸眷爾公爾侯吉甫喜燕七載豐功士民瞻戀勒諸貞
口千秋永傳康熙戊申歲孟冬月合邑紳士兵民同建

神農殿在向辰門外嚮行耕耜禮邑令偕縣丞典史俱在

殿中拈香行禮

采訪

財神殿在武平門外西門市聚集於此

采訪冊

關王廟元至元五年重建

至正志

在縣城小西門外

嘉靖志

鎮波廟在北門外塘上永賴亭之西見寶慶志縣境圖今

地

陳志

喝潮廟與鎮波廟相近見寶慶志縣治圖今地

陳志